

ROMA COMINIMO SAN PABLO ORECABE

La Carta del Apóstol San Pablo a los Romanos

Pablo Rómamo ite Jesumo ínotinomo cuete

¹ Cue Páblodícue; Jesucristo ocuífiregamíedicue. Juzíñamui cuena uáiduano eneno cuena nizede ie jílloña uai jino llóllena. Ua afémie orécacue; Juzíñamui mamécamiedicue.

² Afe bie jílloñafue Juzíñamui jaiai ninomo uícodo ñuera Cuegáuaimo, ie uai llórainido jino llotátate.

³ Afe jílloñafue cai Ocuíraima Jesucristodo úrite. Afémie Juzíñamui Jitó. Iemo jíái afémie cai come izóidimie. Afe Jesucristo jaiai illaíma David méifoidigimamona jocócamie.

⁴ Mei íadi Ñuera Joreño dibénemo afe Cristo uáfodo ríinorede Juzíñamui Jitona cíotaga, mei dama tíllanomona afémie meine cáatateza.

⁵ Juzíñamui Jesucristodo, ñúefuena cuemo itátate. Aferi iere ióbidícue. Afefue cuemo illano, iere cuena canode, ie mámecido oni jíáinomo ie orécamiéna cue íllena. Bie cue ióbillafue ie mámecido oni jíáinomo cue oréllena. Afe cue oréinamona naga náiraíaido aillo Jesumo ínotinona iite. Daje izói ie uaina jíéruitinona iite.

⁶ Afémacimona Crístromo ínotinona itíomoiiza. Ie jira Jesucristo íeíena omoi íllena, Juzíñamui eneno omoi nizede.

⁷ Mei jira nana ómoimo cueticue Roma jófue mo itínodi omoi. Juzíñamui izíruigamacidi omoi. Afémiemo omoi ñue jaináillena eneno uáidogamacidi omoi. Iemo ite caimátaillafue, naa comeci caimare uái illafue diga ómoimo fécaiteza. Nana bífuiaí caí Moo Juzíñamui caí Ocuíraíma Jesucristo diga, ómoimo mámeiteza.

Pablo Rómamo macáacade

⁸ Nana ómoiri fueñe Jesucristodo “Iere figora,” caí Juzíñamuina daií firedicue. Ua daií daidicue mei nágagobiaido ómoimo ite ñuera ínogafuedo úritiaí oí.

⁹ Jaca nana cue comécido Juzíñamuimo táijidicue, ie Jitó ñuera uai jino comínimo llóllena. Nane daje izóí Juzíñamuimo comécido cue úriadi, ómoimo uibíoí firedicue. Aferi Juzíñamui cue uai nabáidimie.

¹⁰ Bie icoí iruimo ómoimo cue jáillena Juzíñamuimo jicá firedicue. Ua Juzíñamui comeci jitaia, nibai nibéfodo ñue cuena óreite, ómoimo cue mácajillena.

¹¹ Mei ómoína cióacadicue, Crístomo omoi ínogafuiaí cue cánuamona, ñue riire jaícina omoi íllena.

¹² Ua bie ínogafue cuemo íteza ja ómoimo ite. Afe Juzíñamuimo caí ínogafuedo conímamo caí úrillamona, conímaíaina comécina caimare náiretaítaí.

¹³ Juzíñamuimo ínote ámatiaí, diga icaiño omoi diné cue jáiacanafue ómoína cue cióillena, ómoimo fidítaacadicue; mei íadi nai jaca jáinidicue. Omoi diné jáiacadicue ómoimona jáíimacina Jesumo

jaináitallena. Ua jeede ria llízie jofo ua izói, afe izói Jesús uaimo ínotinona itáacadicue. Oni jáigobai mona dáarie cue itata izói, daje izói, ómoimona itáacadicue.

¹⁴ Mei cue naga cómemo ñúefuena cue llóllena iere jítáirede. Ua iere baitádinomo llóredicue; daje izói abina onóñedinomo daa fiéñeno llóredicue.

¹⁵ Iemona afe izói cue dibénedo nana afe jílloilluái ómoimo jino ñue lluaíbiacadicue, jica Rómamo itíomoi íadi.

Ñúefue rírede

¹⁶ Bie ñúefue uai jino cue llólleri méairuíñeiticue, mei aféuaimo ite Juzíñamui ríino nana áfemo ínotino jílloillena. Nano fueñe judúuaina jílloitaite, ie mei daje izói judúuáiñedinona jílloitaite.

¹⁷ Bie jíllo nauai Juzíñamui anamo ñue jaícina cai íllena caina fidítate. Dama Jesumo cai ínogafuíaído Juzíñamui anamo ñue jaícina íticaí. (Abi diné jáíena íñede.) Jaiaí Cuegáuai daí daide: “Ínogafuedo Juzíñamui anamo ñue jaícina itímie, zííñona cáaité.”

Nana énie nairai íaíoi fiénidífuiaí ícoínia ite

¹⁸ Mei monámona bite Juzíñamui iere izire duere fínuafue nana fiénidínomo, naa comécina jaícinaíñedinomo jaiaí zúillana, ja birui fidídicaí. Dani íaíoimo ite íaífuedo ua ráfuena ónuana rairuícaíaoí. Daje izói afémaci jáíimacina ua ráfuena onóillena jeruídíaoí.

19 Cai onoiga Juzíñamui dibénemo itífuenta daje izói ñue onódiaioi; mei dama afémie íemo itífuenta nana caimo ciótateza.

20 Juzíñamuimo ite ie cióñena raa, ie finócafuiado caimo ónorede. Jaca énie finuaruimona afémie nahí Juzíñamui nana uáfodo ónorede. Daje izói afémie jaca rínoredeza uáfodo ónorede. Bífuiaina comini náfueñediaioi; íemona dani íaioi ícoinia daí ite.

21 Mei Juzíñamuina onódiaioi íadi, íemo nitárede ñúefuiaina íemo nitáñediaioi. Daje izói íena “Figora” daífinidiaioi. Mei jíáfodo ráifiñede raamo coméiidiaioi. Íaioi abina onótatañede comeci jítifomo fiébicaide.

22 “Nimáirainidicai” daífirediaioi íadi, abina onóñedinona jáidiaioi.

23 Ziiño Juzíñamuimo ite ebíredífuenta ziiñoñede come jánaraina méidotiaioi. Afe baimo figóñede jánaraina finódiaioi. Féedinuiai jánaraina finódiaioi. Jaizai jánaraina finódiaioi. Táicaide rille jánaraina finoda jeire otíaioi.

24 Ie jira Juzíñamui íaioimo ite fiени comeci óiacanafuemo íaioina zóofete. Daí afémaci dani jofó conímamo méaifuiiai finódiaioi.

25 Juzíñamuimo ite ua ráfuenta íñoño tainofuiiai jeire otíaioi. Afe emódomo ie finoca raamo ñúefue nitádiaioi, mei íadi fueñe afe finode Juzíñamuimo ñúefue nitáñediaioi. Daje izói ie finoca raamo caimare áinozioidiaioi, mei íadi nahí Juzíñamuimo cáimadoñediaioi. Bie Juzíñamuina jaca ninomo cáimadoaredicai. Daí íteza.

26 Mei jira Juzíñamui jíáie meáire comeci óiacanafuemo íaioina zóofete. Ringóniai daa íaioi ini

diga íllana féitataiaoí; féitano aillo méaifuiái jíáinori otímaci. Juzíñamui ringóniaí jóonia izóí íacañeno afe jóoniafuena uáitataiaoí.

²⁷ Daje izóí íñiaí daa ringo diga ñue íllana féitataiaoí. Féitano fienu illáfuedo íaiaoí abi bóobicaide, conímaiaimo fienu finóllena. Afe íñiaí conímamo méaifuiái finódiaiaoí, íemona dani afémaci abímona comuídifueri duere zefuídiaoí. Bie izóí Juzíñamui íaioina duere finótate, dani íaiaoí comeci ifue jaícina jóiñena ícoinia.

²⁸ Ja mei Juzíñamuina onóacañediaiaoí, jira íaiaoí comeci jaícina jóiñenafuemo Juzíñamui zóofegaiaiaoí, Juzíñamui rairuícafuiái finódimaci íaiaoí íllena.

²⁹ Afémaci naga íaifuiAIMO itíaiaoí; comeci jaícinaíñenafuemo itíaiaoí. Daje izóí jiruírenafuemo itíaiaoí; fienu jítainafuiAIMO itíaiaoí; naga ráaniaina óiacanafuemo naa fiénidifuiái diga itíaiaoí. Daje izóí afémaci úradorifiredino; come titáfiredino. Fuiríllafuedo úritiaiaoí. Jífuemarifirediaiaoí; ñúeodo jáiñedino. Táinona conímamo fienu úrifiredino.

³⁰ Afémaci jíáima jánana fienu úritiaiaoí. Juzíñamuina éoidiaiaoí. Daje izóí ríimacimo náfueñediaiaoí. TáinofuiAIMO comécidino. Daje izóí fienu abi ínotino. FiénidifuiAIMO comeci facada finófrediaiaoí. Iaiaoí úruiaí móotiaí ocuícafueña jeire oñediaiaoí.

³¹ Afémaci abina onóacañediaiaoí. Iaiaoí daina izóí finófinidiaiaoí. Buna duéruiñediaiaoí. Caimare uáiduano íba oñellena onóñediaiaoí. Daje izóí afémaci jíáimamo dúecañediaiaoí.

³² Juzíñamui ocúíllana ñue onódiaiaoí, íadi óiacañediaiaoí. Afe nana bie fiénidifuiAIMO itino

jaca zíñona duere finólliaioiza, áfena jiái onódiaioi. Onódiaioi íadi aféfuiaina féitaño naí uícadiaioi. Nane bie emódomo jiáimaci afe fiénidifuiái finua llezica, íaioina: “Caímare bie izói cai illi,” daidíaiioi.

2

Juzíñamui nahí uafue daina izói comínimo riire jicánote

¹ Jiáima fieni illafue riire o jicánollena iñede. Naga come “Cue nífuenidícue” daínidiaioi. Nana omoi dáafuemo itíomoi. Mei jiáimamo ite fieni illafue riire o jicánua llezica, dama o abi duere finótaitio. Aféfuena riire jicánotio íadi, o jiái dáafuiaimo itio.

² Mei jii, bífuiaimo itino Juzíñamui duere finótaja llezica, afémie nahí uafue daina izói riire jicánoteza, áfena onódicai.

³ Mei o, jiáima fieni illafue riire o jicánua llezica, o jiái daje izói dáafuiaimo itio. Daíí o illa llezica “Juzíñamui ie duere finóllifuemona nibai cuena jílloite,” ¿daidí? ¡Jílloñeitio!

⁴ ¿Juzíñamui omo zíñona fuiñede dúecaillafuena jámairuitio, naa omo ie járitañenafue díga? Afe bie Juzíñamui omo dúecaillafuedo, afémie o comeci ífuena ñúefue díbénemo méidotaacadeza, ¿afe jaca o comécimo úibicaiñedeza, ero ua?

⁵ Mei o, comécina iere ríiredioza. O comeci ífuena méidoacañedio. Iemona o duere finóllifuiaina aillo ofítaoicaidio. Ua Juzíñamui cíocaizaibilliruimo o jaícina jóoide duere finuafue jino omo llóite.

⁶ Aféruido naga come daní íaioi finócafuiái izói, íaioimo íbátaite.

7 Aféruído ebíredifue jenóðinomo, zíiñona cáataitino íaioimo iite. Daje llezica, nana Juzíñamui íaioimo ñúefue nitállena jenóðinomo, naa zíiñona illa raa jenóðino diga, Juzíñamui zíiñona cáataitino íaioimo fécaite. Aféfuiaina jenódiaioi, mei nágarui féitañeno ñúefue dibénemo ífirediaioi.

8 Mei íadi aféruillaído nana fiени abi ínotinona, Juzíñamui duere fínoite. Daje izói nana ua ráfuenta jeire óiacañedinona Juzíñamui ie ríifuedo duere fínoite, fiénidifuiái jeire íaioi ua jira.

9 Nana fiени mácafiredinomo aillo duere zefuillifue iite, naa jamánomo íaioi comeci zúunaillifue diga. Nano fueñe daí judúuaimo iite; ie mei jíái daje izói judúuaiñedinomo cómuite.

10 Mei jíáifodo ñúefuiái finóðinomo, Juzíñamui íemo ite ebírenafue íaioimo iite, naa comeci caimare uái illafue diga. Daje llezica Juzíñamui íaioimo ñúefue nítaite. Nano fueñe daí judúuaimo iite, ie mei jíái daje izói judúuaiñedinomo cómuite.

11 Comínimona dámie jíáie come baimo Juzíñamui gáigamie iñede.

12 Nana fiени itino Moisés ocuífafuena nai onóñena llezica, íco nine tánocaitiaioi, aféfuena nai onóñenano. Daje izói nana jíáie fiени itino Moisés ocuífafuena onódiaioi íadi, afe daje bie ocuífafuedo riire jíacánolliaioi.

13 Mei ocuífafuena tánona cacáðino Juzíñamui anamo ñue jaícina iñediaioi, mei íadi ocuífafuena jeire otino Juzíñamui anamo ñue jaícina itíaioi.

14 Dáarie ocuífafuena onóñede judúuaiñedino afe ocuilla daína izói daní íaioi comécido jeire otíaioi. Iemona afémaci daní abi lletáðinona itíaioi.

15 Mei jii, íaiói ñue mácafuedo íaiói comécimo ocuica uai cúeinana ácatafirediaíoi. Afe llezica íaiói comeci úrilla uai ñue íaiói uaina nabaide. Daje llezica íaiói ifoci úrillafue fiénidifue íaiói finóadi, áfena íaióimo llóite. Fiénidifue nai íaiói finóñenia,

16 Juziñamui comínimo riire jicánolliruimo íaiói ifoci úrillafue íaióina ráiruite. Aféruillaído naga comini báinino finoca raana Jesucristodo Juziñamui riire jicánoite, cue lloga jílloilliuai daina izói.

Judíuai Moisés ocuífafuemo figo náfueñediaíoi

17 Mei ja birui, “Judío ímiedicue” daidío. O jílloillena, Moisés ocuífafuemo ínotío; o Juziñamui dibénemo fiени abina ínotío.

18 Juziñamui comeci jitáinafue onódío; afe ocuífafue omo llote: “Nana o nícidogafuemo ñuera diga o nizeri”.

19 “Uínidino izóidino ifóllena, ñue uáfueña onódicue,” daidío. “Daje izói jítifodo macádinona ñue egáñollena onódicue,” daidío.

20 “Abina onóñedinona llófueredicue,” daidío. Daje izói, “Urue izóidinona jaícina llófueredicue,” daidío. “Ua nahí ráfueña onótate uai afe cai ocuífafuemo ite,” daífiredío. Afe izói, “Nana ifócido onóigafue caimo ite,” daidío.

21 Mei jiáimana llófuetío íadi, ¿ñibái mei dama o abina lletáñedio? Omoi meríriñeno iri daícadío íadi, ¿ñibái mei merírifiredío?

22 Omoi jiruíreñeno iri, dama daícadío íadi, ¿ñibái mei jiruíredío? Jánaraiana éoidío íadi, ¿ñibái mei íaiói illácomo ite ráifide ráaniai o mériano ráaredimiena jáidío?

²³ Ocuilla uai dibéfodo iere abi ínotio; mei íadi Juzíñamuina jámairuitio, afe daje ocuícafuena jeire o oñena ícoinia.

²⁴ Meita Cuegáuai ñue daide: “Judíuaiñedino omoi ícoinia Juzíñamuina fiени úritiaioi.”

²⁵ Moisés ocuícafue jeire o oíadi omoi finófirena bacano icoi quétafue uáfuena omo ráifite. Mei íadi afe uai figo o íñoñeniadi, jaca quétañegamie izói ítío.

²⁶ Mei jíáfodo, daa bacano icoi quétañegamie ocuícafue daína izói jeire oíadi, afémie bacano icoi quetácamié izói facádoga, quétañega íadi.

²⁷ Afe bacano icoi quétañegamie, mei íadi ocuícafue jeire otímie, ona riire jicánoite, bacano icoi quetácamiéna o íadi, daje izói cuega ocuícafue omo íte íadi, mei áfena jeire oñédioza.

²⁸ Judíona jáillena dama jinófenemo cíoide ráaiñede. Daje izói bacano icoi quetácamiéna jáillena fia abimo cíoide ráaiñede.

²⁹ Mei íadi nahí ráfuiái jíáfodo jóide. Nahí jáidimie ie comécimo áfena jaide. Daje izói nahí bacano icoi quétafue comécimo dúide. Cuega ocuilla uaimo jáináíñede; mei íadi come joréñodo ie comécimo íte. Bie izói ítímie comínimona jíeruiñegaza, mei íadi Juzíñamui jíeruiga.

3

¹ Judío ímiéna cue íllemona ¿minica mei baimo óiticue? ¿Bacan quétafue mei nibénemo ráifide?

² Judío ímiéna cue íllamona áillofuiái ícoinia ñue íiticue. Daje izói quétafuemo aillo ráifinafue

ite. Nano fueñe Juzíñamui ie comeci úrilla uai Judíuaimo orede.

³ Iaiomona dáarie íaioi ñnogafuena féitaiíoi. Féitaiíoi íadi, Juzíñamui lloga uai jáanonide, mei afe Juzíñamui jaca féitafinidimie.

⁴ Ie íaioi féitaja íena nie izói nibáíñede. Mei jíáfodo íteza: nana comini taino llófredino ille llezica, Juzíñamui nana ie jetáacaigafuena nai uáfuenta jaícina finode. Daí Cuegáuai úrite:

O daina uáillaimona jaícinaidimiena o íllana ónoitaiíoi.

Riire o jícanua mei, comini ñue ñnogamiena íitio.

⁵ Mei caimo ite fiénidifuedo Juzíñamui jaícinaidimie illáfuenta jino uáfomo cíotaiadi ¿nie izói dáiticaí? ¿Mei Juzíñamui cai duere finóllena jaícinaíñedimie? (Jamai come úrilla izói úriticue.)

⁶ Mei íeñedeza. Mei Juzíñamui comécina jaícina íñeniadi, ¿nie izói nana énie comini riire jícanoite? Afémie jaca ninomo comécina jaícina jóidimienamona, nana náiraina riire jícanorede.

⁷ Mei cue tánofuiado Juzíñamui uafue nai jamánomo cue ebíruiadi, ¿nibái mei fiénidimiedicue izói Juzíñamui riire cuemo jícanote?

⁸ Bie uáfuenta, ñúefue bíllena nibái mei fiénidifuenta finóñedicaí. Afe bie izóidifue llófuiana dáarie caimo jítaíaiíoi. Bifue caimo jítaíadino comeci fieni jítainafuedo úritaiíoi. Bie izói itino duere finólliaíoi.

Nana caimo ite fiénidifue ícoinia

9 ¿Mei níifue? ¿Cai bie judíuai jíáie comini baimo ñuera? Mei ua íeñede. Ja como fidítaticai judíuai naa jíáie comini diga riírede fiénidífue anamo itíai*oi*.

10 Jai*ai* Cuegáu*ai* daí*i* daide:

Buna jaca íaifuenidimiena iñede.

Jaca ninó daa ñúemiena iñede.

11 Daje izó*i* jaca ninó ñúefuena onóacadimiena iñede.

Daje izó*i* Juzíñamui daa jenódimiena iñede, ie diga íllena.

12 Nana Juzíñamuimona onido jáidia*oi*.

Afémaci dan*i* fiénidimacina jáidia*oi*. Buna ninó ñúefue finóñena.

Jaca ninó daa iñede.

13 Iai*oi* úrirago*i* íbaiñega raiafo izoide, mei iere íaire úritia*oi*za.

Iai*oi* fuerdo jífueमारifiredia*oi*.

Iai*oi* fuerdo ite úrilla jai*o* aifo izoide, mei jíáima jánana iere fi*eni* úritia*oi*za.

14 Afémaci daa faidórafuiaido úritia*oi*, naa íairede uáilla*ido*.

15 Come titállena jarire áizicaidia*oi*.

16 Iai*oi* fi*eni* illáfuerdo aillo jíáimaci táinocaitadia*oi*.

Daje izó*i* comínina zúunaitadia*oi*.

17 Afémaci comeci caimare uái illáfuenta onóñedia*oi*.

18 Daje izó*i* afémaci Juzíñamui ñue jacírenafuerdo due jiza comeci facáñedia*oi*, —daí*i* jai*ai* Cuegáu*ai* daide.

19 Nana jai*ai* ocuícáfue daína uaina, afe ocuícáfue anamo itinomo dúide. Bífuenta ñue onódicaiza. Daí*i* Juzíñamui mamérite, nana comini úrillana líicaitallena; daje izó*i* naga nairai Juzíñamui riire jícanollífue anamo íai*oi* itábicaillena.

20 Ocuica uai jeire cai úado, buna Juziñamui anamo ñue jaícina íñeite. Ocuícafue caina jílloñaite; daa caimo ite fiénidifuiaina caina onótate.

Jíllloillifue cai íñogafuedo comuide

21 Mei birui, jácara ocuícafue oni eneno fiiano, Juziñamui anamo ñue jaícina cai íllena afémie cómfuena caimo onótate. Bie cómfuena uai lloraini ciegánico facádoiadi ónorede. Daje izói ocuilla uai cúeinanicomona jiái ónorede.

22 Juziñamui anamo ñue jaícina cai illifue bífuedo ite. Dama Jesucristomo cai ínuado bie izói íticaí. Nana ie uaimo ínotinona afémie daje izói fínoite; dáamie jiáimie baímo gáíñeno nana dájerize jaícina jóoneite.

23 Mei naga come fiénidifuiarede; jílloitaite Juziñamuimona nana jica itíaiói.

24 Mei íadi Juziñamui caimo dúecaillanona, fia íbátáñeno ie anamo ñue jaícina caina itátate. Mei dama ie jitó Jesucristodo caina jíllotata.

25 Cai finoca fiénidifue íbana Juziñamui Jesucristo tíllamo dane ote. Iemona íaífuena dogá izói iticaí. Bie múiñuafue cai íñogafuedo caimo dúciite. Bifue daí íficaide Juziñamuina jaícinaidimie daíllena. Mei jaiái finoca fiénidifuiái íbana raire otátáñede; afémie comécina járidoñedimie.

26 Daje izói daí íficaide birui Juziñamui jaícinaidimie daíllena. Nana Jesumo ínotinona Juziñamui nai birui afémie anamo ñue jaícina

itátate. Iemona Juzíñamui nai jaícinaidimiena íoicaite.

²⁷ Ie mei ¿come abí ínuafue mei nie izói ite? Afe abí ínuafue oni eneno fiébicaite. Ocuícafuiái jeire íaíoi úado nai fieni abí ínuafuemo itíaíoi. Mei íadi Jesucrístomo ínogafuemo fieni abí ínollifuenta íñede.

²⁸ Nana cai llogáfuiáimona bifue jino llúana ñue baite. Dama Jesumo ínotimie Juzíñamui anamo ñue jaícina írena. Ocuica uailái afémie jeire ua oni jíáífodo joide. Afena Juzíñamui náfueñede, dama íemo ínuana náfuete.

²⁹ ¿Meita Juzíñamui dama judíuai íena? Ieñede. Daje izói afe Juzíñamui judíuaiñedino ie.

³⁰ Mei jíi Juzíñamui damade. Afémie baímo jíáíena íñede. Afémie nana íemo ínotinona ie anamo ñue jaícina itátate. Afémaci bacano ícoi íaíoi quétajana náfueñede. Daje izói quetáñenana náfueñede.

³¹ Ie mei níbai dámie jícanoite. ¿Meita cai ínogafuedo ocuilla uaina uáitaiticai? Ieñedeza; úaitañeíticai. Mei jíáífodo Jesuna cai ínuado afe ocuilla uaina uáfuenta jíéruiticai.

4

Abraham Juzíñamuimo ínuua izói cai ínollena cai onótate

¹ Mei áfemona cai jaiáidígima Abraham dibénemo jíáífue jícanoíticai. ¿Afe Abraham mei nie ñúefue ote? Daina uai jeire ie ófirenamona abí díne nífuena oñede.

² Mei Abraham ie finócafuiado Juzíñamui anamo ñue jaícina ie itábicaiaidi, afémie abi ínnorede. Mei íadi Juzíñamui uícori afémie abi ínnonide. Ie finócafuiado Juzíñamui anamo ñue jaícina itátañega.

³ Mei jiáifodo Cuegáuai daína izói, “Abraham Juzíñamuimo ínote.” Iemona Juzíñamuimo ie ínuado Juzíñamui íena “Íaifuenidimedio” daide.

⁴ Da come táijiaidi, afe táijina iba fia íemo dúecaillano íñega; afe táijitatimie íena íbárede. Mei íadi cai jíllloillifue cai táijicanado iba llínua izói llínonide.

⁵ Mei jiáifodo, dámie jíllona táijina finóñeno, ie jíllloillena dama Juzíñamuimo ínnorede; mei Juzíñamui íemo ínote íaifuiaredimiena llínofiredeza. Mei íemo Juzíñamuimo ie ínuado, Juzíñamui íena: “Íaifuenidimedio,” dáite.

⁶ Dama David come cáimafuiado úrite. Dámie ie uícodo finócafuiaina Juzíñamui náfueñede. Ua náfueñede, mei íadi íemo ie ínuado Juzíñamui íaifuiainide daínámiena afe ínotimie jaide. Afe daítadimie iere caimare ite.

⁷ David daínáuai daide:
Íaioimo ite fiénidifuiaina Juzíñamui dogánona iere íóbidiaioi.

Daje izói íaifuiaina oni féitagamíai iere íóbidiaioi.

⁸ Daje izói íaioimo ite fiénidifuenta náfueñegano iere caimare itíaioi.

⁹ ¿Meita bie cáimafuai dama bacano ícoi quetaca judíuaimo duide? Ieñedeza; nana comini íena mameide. Jira bacano ícoi quétañega judíuaiñedimacimo daje izói afe cáimafue íaioimo

duide. Jae llotícueza Abraham Juzíñamuimo ínuado Juzíñamui íena: “Íaifuiainidimiedio,” daide.

¹⁰ Mei íadi ¿níruido daí íena daina? ¿Bacano ícoi quetaa mei daí daina? ¿Nibai quétañenia daí daina? Jii, uáfueza, nai quétañena llezica daí íena daina.

¹¹ Afe: “Íaifuenidimiedio,” daina méifodo, Abraham bacano ícoi quétafueña Juzíñamui ocuide. Bie quetaínafue onóillena jónega raa izoide, Juzíñamui ja bímie ie ínuafuedo íaifuenidimie daíllena. Daí Abraham nai quétañena llezica Juzíñamuimo ie ínuamona, nana judíuaiñede ínotino moona jaide. Iemona Juzíñamui daje izói nana afémacina: “Íaifuenidimioi,” daide.

¹² Uáfueza. Abraham nana afémie dama ie ínua izói ínote quétacano moo. Mei nanoide cai moo Abraham ie bacano ícoi nai quétañega ia, ñue Juzíñamuimo ínoteza.

Juzíñamui jica ia raire llogáuai comini ínuamona ñue ícoimo fuitaca

¹³ Mei jii, Juzíñamui Abrahana ñuera jica ia raire fidítauai daide. Aféuai llote: “O nana o erófene igímaíairi nana éniena máíñoitíomoi.” Abraham Juzíñamuimo jaiái uícodo ínua jira, Juzíñamui bíuai íemo llote. Fia ocuilla uai ie jeire úado Juzíñamui daí íena daíñede. Ua, dama Juzíñamuimo ie ínuado Juzíñamui íena: “Íaifuenidimiedio,” daide.

¹⁴ Mei dani ocuilla uai jeire otino ñúefueña íaíoi maíñoádi, íemona ínogafue comínimo figo jínoñede. Daje llezica Juzíñamui jica ia raire llogáuai ráifinano niné feide. Mei íadi daítañedeza jíáfodo

joi. Juzíñamui mo cai ínuafuedo ie caimo lloga ñúefuena maiñóredicai.

¹⁵ Ocuilla uai llóina meífodo aféuai jeire oñédino duere finótalliaioi. Mei íadi ocuilla uai nai lloñena llezica, aféuai náfuenide.

¹⁶ Afe Juzíñamui Abrahamo jica ia raire llogáuai, Juzíñamui ñue riire mamede, nana ie erófene igímaiai afe ñúefue jeire íaioi óllena. Mei jira, afe Juzíñamui lloga ñúefue, fia fecaca raa izói comini Juzíñamui ínuado íaioimo írede, mei áfena íaioi ñéfina cígimona ónidiaioiza. Bifue daíacade, Juzíñamui uícodo raire llogáuai daa ocuilla uai jeire otino íeñedeza, mei íadi nana Abraham ínua izói ínotino ie.

¹⁷ Iemona Abraham Juzíñamui eróicana nana cai moona jaide. Abraham afe Juzíñamui ñue ínote. Jaiái Cuegáuaido Juzíñamui Abraham daí daide: “Aillo náiraiai moona ona jóneticue.” Afémie daí daírede, mei Juzíñamui tídinona meine abido caátaitaredeza. Daje izói íñede ráaniaina Juzíñamui itátarede.

¹⁸ Aféfuiaimo Abraham fáicanocaiñeno ínoide. Ua comini daína izói Abraham jamánomo jónaiteza, ja úruenide. Abraham daí úruereillinona úiñonina llezica nai Juzíñamui ínuano úiñoide. Afe daí Juzíñamui íena daína izói, Abraham “aillo náiraiai moona” jaide. Juzíñamui bie izói íena daide: “O uícoide erófene igímaiai aillo jébuitiaioi,” daide.

¹⁹ Abraham cien fimónamo ánozide íadi, ie ínogafue jaca féíñede. Afémie jónailla izói ie ai jónaillana onode. Ua afengo iere jónaillamona

tíiacade. Jae úruena comuítanide.

²⁰ Mei íadi afe llezica Abraham jizíñeno Juzíñamuimo ínofirede. Juzíñamui jica ia raire llogáuaina ruifíruiñeno nai íemo ínoicaide. Mei jííáfodo Abraham áfena féitañeno iere izire ínote. Jaca comeci rairuíñeno Juzíñamuimo úrioicaide. Juzíñamuimo íobioicana úrite.

²¹ Afémie daide:

—Nana jaiái Juzíñamui jica ia raire cuemo lloga rafue Juzíñamui uáfuenta cuemo zúitaite, —d-aide.

²² Iemona, íemo ie ínuado Juzíñamui íena daide: “Íaifuenidimiedio,” daide.

²³ Bie Juzíñamui Abrahana daina “Cuemo o ínuado jae íaifuenidimiedio” daa Abrahamo cúeñegaza,

²⁴ mei íadi nana caimo cuega cai ínollena. Mei jira tíllanomona cai Ocuíraima Jesús cáatate Juzíñamuimo birui ínoticai. Iemo cai ínuado caina: “Íaifuenidimiedio,” dáite.

²⁵ Afe Jesús caimo ite fiénidifue ícoinia duere finótagamiena jaide. Afe mei Juzíñamui anamo ñue jaícina nífuenino cai íllena afémie cáataga.

5

Juzíñamui “Nífuenidimiedio” daina méifomo ñue cai illifue

¹ Mei afe jira, dácaiño Juzíñamui anamo ñue jaícina nífuenino cai illa mei, meine abido Juzíñamuina jáciruiñeiticai. Afe comeci caimare uái illafue cai Ocuíraima Jesucristo ie tíllado cáiena ote.

² Mei jii, cai ínuado bie afémie cai cánuafue dibénemo jóonegacai. Aferi izire jaináidicai. Iemona íóbifiredicai, mei Juzíñamuimo ite ebíredemona cáiena oni máíñoiticaiza. Afemo ocuíríticai.

³ Daa bie cai ocuírillamo íobiñeíticai, mei daje izói duere cai zefuíllifuemo íóbiticai. Mei onódicaiza duere cai zefuíllifue cai comeci járítañenafue caímo comuide.

⁴ Iemo afe comeci fígómie dáinana caina jáitate. Iemo fígómie dáinana mei Juzíñamui cáimafuemo úiñoifireíticai.

⁵ Iemo bie úiñoínaafue caina zúucaitañeite, mei Juzíñamui caina ie izíruillafue ñue caímo llóteza. Bie caina ie izíruillafuena ie oreca Ñuera Joréñodo onódicai.

⁶ Dani cai ñéfina cígímona jíllonidicai. Daíí cai illa llezica, Juzíñamui jica ia mamécaruimo, Jesucristo nana fiénidino ifomo tízaibite.

⁷ Bíniemo comécina jáicina jóidímie tílla ifomo tíitimiena iñede. Mei níbai jamánomo fígómie ifomo, daa tírede.

⁸ Mei jíáifodo cai fiene illa llezica, Cristo cai ifomo cai jíllloillena tízaibite. Afedo Juzíñamui caina ie izíruillafue caímo cíotate.

⁹ Iemona ja birui Cristo tíllamona Juzíñamui anamo ñue jáicina itícaiza, ie jira íirairuimo ite duere fínuafuemoná, Cristo cai rairuíllado, jamánomo oni eneno íredicai.

¹⁰ Nai afémie bacáuai imácina cai illa llezica, ie Jitó cai ícoínia tíide. Daíí ie tíllamona, Moo Juzíñamui comécina jáciruitañegacai. Ja birui cai

comeci íena jacíruiñenamona, birui ie cáanado jamánomo ñue jílloredicai. (Ua caade Cristo Juzíñamui uícomo caído úrite. Afe daíí ie úrioinado, ico bite duere cai finóllifuemona jíllotícaí).

¹¹ Daa bífueñedeza, nane bie emódomo cai Ocuíraíma Jesucrístodo Juzíñamuimo íóbioitícaí, mei afe Crístodo Juzíñamuina cai jacíruiñenafuena otícaíza.

Nanoide Adán caímo comuítagafuemona Juzíñamui caína éoícaide; mei jíáífoto Cristo caímo comuítagafuedo Juzíñamui caímare caído eróícaide

¹² Mei onóígaza, dáamiemona fiénidífue nana comínido jaide. Ie mei afe fiénidífuemona tíillafue daje izóí naga cómemo comuide, mei naga come fiénidífuiáiredeza.

¹³ Moisés ocuilla uai nai iñena llezica, fiénidífue jaca comínido ite. Mei íadí ocuilla uai nai iñena llezica, afe fiénidífue comínimo nítañega.

¹⁴ Mei íadí jaíai Adán illáígimamona Moisés illáígimamo fiénidífuiái finódino tícoízifírediaíoi, mei tídade ríino anamo itíaíoiíza. Juzíñamui jóonega íaíoi começi ñue úrilla uaimo náfueñediaíoi. Daíí náfueñenamona íaíoi fiénidífue comuide. Mei jíáífoto Adán fiénidífue Juzíñamui uáfodo lloga rairuica uai jeire ie oñenamona comuide. Mei íadí bie Moisés uícodo itino fiénidífue jíáínodo comuide. Adán finoca fiénidífue izóí comuíñede. Afe Adán uire bíite Cristo jana.

¹⁵ Adán náfueñegafue Juzíñamui caímo fia iga cáímafue izóíñede. Mei dama Adán náfueñegafuedo nana comíni tímáritiaíoi. Mei íadí Juzíñamui

raiñóñeno caimo fecaca jíllonafue jamánomo baimo ñuera. Dama Jesucristodo aillo comini canócaiaioi.

¹⁶ Dáamiede finoca fiénidifue jaca Juziñamui caimo fecaca jíllonafue izóiñede. Mei afe daade Adán náfueñegafuemona cai duere finóbillifue zúide, mei jiáifodo Juziñamuimona caimo lloga jíllonafuedo, Juziñamui raiñóñeno aillo comínina ie dibénemo ñue jaícina itábicaitate, aillo íaioi náfueñegafuiaí íaioimo ite íadi.

¹⁷ Mei jii, daa come náfueñenamona titáfirede ríino anamo nana comini are ninomo itíaiioi. Mei jiáifodo dáamiede Jesucristodo nana Juziñamui anamo raiñóñeno ñue jaícina jónegano, jamánomo baimo ñuera zíiñona íaioi ille ríino óitiaioi.

¹⁸ Mei dáii Adana náfueñegafuemona duere finóbillafue nana comínimo comuide. Daje izói Jesucristo nífuenide comécimona tíizaibillafuemona, duere finóbiñenafue nana comínimo zuide. Daje llezica zíiñona cai illifue caimo comuide.

¹⁹ Bie daide: dáamiede jeire óñegafuemona nana comini fiénidifuiaredinona jáidiaioi. Mei íadi dáamiede Jesucristo jeire ogáfuemona aillo comini Juziñamui anamo nífuenidinona ñue jónegaiaioi.

²⁰ Mei jaiái Juziñamui cai ocuilla uai caimo lloga, caimo ite fiénidifue jino uáfodo cai onóillena. Ua, ocuilla uai llua mei caimo ite fiénidifuiái aillo jebuide. Mei íadi daje llezica Juziñamui caimo dúecaillafuiaí daje izói afe fiénidifuiaí baimo aillo jamánomo jebuide.

²¹ Iemona, fiénidifue caimo íllamona afe riírede fiénidifue caina titárede. Daje izói Juziñamui caimo

izire dúecaillano, Juzíñamui anamo nífuenino ñue jaícina cai illa llezica, cai Ocuíraima Jesucristodo, afémie caina zíñona cáatarede.

6

Comini fiénidifuiamo illamona tíidino izóidiaioi, mei íadi daje llezica afémaci Crístomo ñnuamona cáadiaioi

¹ Nana bie caimo llógamona ¿nie izói dáiticaí? ¿Mei nibai fiénidifue finócana uiticaí, Juzíñamui jamánomo caimo ie dúecaillafue caimo ácatallena?

² ¡Mei íeñedeza! Cai bie ja fiénidifue dibénemo tíidinodicaiza ¿mei nie izói, fiénidifuemo nai íocaiticaí?

³ ¿Nai bífuena onóñediomoi? Nana cai ie báutizaillaruimona Jesucristomo uáfuena jainaina llezica, dáaruído afe Cristo tíilla dibénemo jaináitagacaí.

⁴ Mei jii, cai báutizaillaruimona Cristo diga dáafomo raigacaí izóidicaí. Iemona aféruimo tíidinona maméidicaí. Ua tíidinona mamécacaí, áfemona Cristo ie tíillanomona meine abido cáadimiena jailla izói, birui cáadena cai jáillena. Daí cai jaillano cómfuemo íocairedicaí. Mei jii, Cristo ie Moomo ite jamánomo ñuera ríinodo meine cáadimiena jáitaga, íemo daje izói afe daje ríinodo cómfuemo íocairedicaí.

⁵ Uáfuena dáitícue, Cristo tíilla izói tíidinona jae mamécacaí. Iemona daje izói ie meine abido cáadimiena jailla izói, dani cai tíillanomona meine cáataga izói cómfuiamo íredicaí.

6 Cristo cruzmo coraica llezica nauí fueñe cai illafue dáanomo titácaza onódicai. Uafue, afefue titaca, nanómona cai comécimo ite fiéni gáinano caina anáfenóñeillena. Iemona fiénidifue dibénemo rairuícana íñeíticai. Daje izói riire tájitatimíemo jainaina izói, fiénidifuemo jáinaiñeíticai.

7 Mei jii, Cristo diga tíidimie ja íaifuemona oni jirecaide.

8 Iemona dácaíño Cristo tíilla izói dáanomo afémie diga, cai comeci fiéni óiacanafue tíide izói féitaga. Nauí daíí ie diga cai tíillamona, daje izói biruúllaído afémie diga cai íllana ua onódicai.

9 Mei onódicaíza, Cristo dácaíño tíillanomona meine abído cáadimíena jaide. Daíí meine jailano ja meine abído dánomo tííñeite. Afémie ja ménacaíño tíinide.

10 Mei Cristo ie tíillaruimo, fiénidifue dibénedo dácaíño tíide, jaca ninomo nane tííñeillena. Mei íadí afémie meine cáadena jaillano ie cáanano Juzíñamuimo duide.

11 Daje izói, mai fiénidifue dibénemo tíidino izói omoí iri. Mei jáífodo Juzíñamui íena cáadinona mai omoí iri. Afemo izire comécimo mai omoí facáoiri, mei cai Ocuíraíma Jesucrístomo dájena jáináidíomoíza.

12 Ie jira fiénidifuena omoí abína náamatatañeno iri; afefue omoí zííñona íñena abí ana úillemona abí omoí rairuiri. Mei Taífe comuítaga caímo ite íaífue cai abí fiéni jítainafue jino déíllena ocuíoídeza. Afemona izire abí omoí rairuiri.

13 Daní omoí abína fiénidifuena finótañeno iri. Mei jáífodo daní omoí abína Juzíñamuimo omoí

jaináitari; ua, tíllanomona meine cáadena jaide izóidino afémiemo omoi abi jaináitari. Ie jira nana omoi abina Juzíñamui ñúefue finóllena, omoi jaináitari.

¹⁴ Ja benómona fiénidifue ómoína ana úiñeite. Mei ocuilla uai anamo ja íñedicaiza; mei jiáifodo Juzíñamui cairi dúecaillafuemo itícaiza.

Comini jacire riire rairuúllaruimona daa ráfuenta caina onótate

¹⁵ Ie mei ¿nie izói itícaí? Mei ocuilla uai anamo íñedicaiza mei jiáifodo Juzíñamui cairi dúecaillafuemo itícaiza; ímona ¿meita fiénidifue finóredicaí? Ieñedeza, finónidicaí.

¹⁶ Ñue onódiomoiza, ómoimona nágamiiaí riire ocuídillaímamo fecaca llezica, aféllaíma ocuúllana ñue jeire órediomoi. Daje llezica aféllaímamo izire jaináidiomoi. Bie izói caimo ite fiénidifuiái, jacire ocuídillaíma ana uilla izói, nana caina ana uite. Afemona tíllafue naga cómemo comuide. Mei íadi Jesumo cai ínua llezica jiáie cai ocuídillaíma Juzíñamuimo dúidicaí, comécina jaícina ñue jóidimacina nágarui cai íllena.

¹⁷ Mei íadi ómoiri Juzíñamuina: “Iere figora,” daidícue. Mei nauí fiénidifueimo izire rairuúcanona omoi illa llezica, ómoimo lloga llófueinafuenta ja ñue jeire otíomoiza.

¹⁸ Afe fiénidifuemona oni omoi jírecailla mei, jiáie ocuúraíma Juzíñamui rairuúcanona jáidiomoi. Iemona comécina jaícina ñue jóidinona nágarui írediomoi.

19 (Ua omoi onoiga comini ráfuiáido úriticue, mei omoi ifoci déiñenamona bífuiaina ñue cacánidi omoi.) Naui fieni illáfuiaimo omoi abina jaináitafiredi omoi. Nane afe baimo jiáie jamánomo fieni abi fínuamo abina finótadi omoi. Naui daí abina omoi finota izói, mai birui comeci jaícina nafuemo abí omoi jaináitari, dama Juzíñamui íena oni eneno ñue mamécanona omoi íllena.

20 Nai fiénidifuiaimo riire rairuícana omo illa llezica, comeci jaícina jóinafuemo jaináíñedi omoi.

21 Naui omoi illáfuiaina birui meáiruiti omoi. Mei aféfuiaimona ¿nie cánuafuiái otí omoi? Oñedi omoi za; tíllafue diné jaca ómoína uite.

22 Mei íadi fiénidifuemona oni eneno omoi jirecaillamona, ja birui Juzíñamui rairuícana omoi. Iemona birui afémiemo ñue jaináidi omoi. Bie izói omoi íllamona, Juzíñamui íbana ñue caimare ómoína cánoite. Ua afémie íe íena ómoína oni eneno ñue fínoite. Iemona afe ícoimo zíiñona illáfuena óiti omoi.

23 Fieni cai íllamona daa tíllafue óitícaí. Mei íadi Juzíñamui raiñóñeno fia caimo iga raa, cai zíiñona illí fue. Bie zíiñona cai illí fue dama cai Ocuíraima Jesucrístomo dájena cai jaináinamona caimo iga.

7

Íma áireinamona ringo iníreinamona daa ráfuena cai onótate

1 Amatíai, onódi omoi za, da come dama nai ie tíñeniadi, ocuilla uai nai íemo dúide.

² Ja omoi onóigafue jino llóiticue, áfedo jiáifueña omoi onóillena. Da inírede ringo, ie ini caana llezica, ocuilla uaido ie inimo cuinaca izói jainaide. Mei ie ini tilla mei, afe íemo jaináitate ocuilla uáimona afengo jae oni jirecaide.

³ Afe llezica afengo jiáie ímamo inírena ñuera. Afengo dai iníreilla jiruífede. Mei íadi ie ini nai ítemo afengo jiáie íima diga illa afengo iere jiruífede.

⁴ Cue ámatiai, birui Jesucristo abimo dájena jaináidicai; ua iníredingo inimo jainaina izói jaináidíomoi. Afe Crístomo omoi jaináinamona, ie tíllado tíidinona mamécaomoi. Ie jira ocuilla uai dibénemo tíidino izói iticai. Fueñe bie ocuilla uaimo, ringo inimo jainaila izói, jaináidicai. Mei íadi ja birui tíidino izói cai íllamona afe ocuilla uaimo jaináíñedicai. Dama tíllanomona meine abido cáadimíena jaide Crístomo jaináidicaiza. Afe bie Crístomo cai jaináinana Juzíñamui caimo comúitate. Ua comúitate caido ie comeci jitáinafue ñue ícoimo cai fuitállena.

⁵ Mei nanómona comini comécimo itífue dibénemo cai ífirena llezica, afe ocuilla uai cai abimo ite fieni óiacanafuíaína cazítate. Aféfuiai caina ana tíllinomo uite.

⁶ Mei íadi ja birui afe ocuilla uai dibénemo tíidino izóidicai. Fueñ afe ocuilla uai anamo riire iticai, mei íadi ja birui afe uáimona ñue oni jirecaidicai, Ñuera Joreño cómuena méidoga caimo itífuedo Juzíñamui ocuícamacina cai íllena. Jai-iai cuega ocuilla uaido Juzíñamui ocuícamacina ínidicai.

Cuomo ite íaifue cue caimare illafue llótaidote

⁷ Iemona ¿mei nie izóí dáiticaí? ¿Ocuilla uaina fiénidifue daíredicaí? ¡Daínidicaí! Mei íadi afe ocuilla uaido fiénidifuena onótagacue. Afe uai nai jino lloñena llezica fiénidifuena onóñedicue. Ja omoi onóigafue jino llóiticue, áfedo jíáifuena omoi onóillena. Ocuilla uai nai cuena dáíñeniadi, aino come raana óiacanana onóñedicue. Mei íadi afe daííllua mei fieni óiacanana onódicue.

⁸ Afena cue onónamona, bie ocuilla uai llúado, cue comécimo ite naga fieni jítainana uáfodo cazítaga. Mei ocuilla uai nai cuemo lloñena llezica, fiénidifue tíide izóí uái illano figo onóñedicue.

⁹ Nauídíruimo, ocuilla uai cúemona nai oni eneno illa llezica, cue comeci úrilla caimare ite. Mei íadi ocuilla uai ja llúaíbillado fiénidifue meine abido comuide. Afefue meine comuíllamona fállena cue orede.

¹⁰ Dinómona bie izóí cuemo zúide. Daje cuena ñue zúñona illífuemo úirede uailai, ñue illífuemo cuena uíñede. Mei jíáfodo cue dibénemo, cuena ana tíillanomo uite.

¹¹ Mei jíí, fueñe fiénidifue cuemo íñede daídicue. Mei íadi ocuilla uaina cue fídiamona, cuemo ite fiénidifuiaina onódicue. Afe ícoinia Juzíñamui fáiacagamiena iticue.

¹² Afemona onoiga, afe ocuilla uai iere ñuera. Daje izóí lletara uai jamánomo ñuera. Afe uai ñue jaícina jóidiuai.

¹³ ¿Meita bie ñuera ocuilla uai cuena ana tíillinomo úirede? Ñue onóigaza, únide. Mei jíáfodo cuemo ite fiénidifuedo ana tíillinomo uigacue. Afemona uáfuena cíotagaza, bie fiénidifue ua

nahí fiénideza. Afe cuena ana uillafue ñúefuedo finoca. Daií Juzíñamui ocuilla uai, nana fiénidifuiái jamánomo íaire nana caina onótate.

14 Afe ocuilla uai Juzíñamui Ñuera Joréñomo dúidifue. Afena onódicaiza. Mei jiáifodo nanómona cue comécimo itifue Ñuera Joréñomo dúíñede. Mei izire rairuícamié izói íaifue finuanamo fecácamié izóidicue.

15 Birui cuemo íficaidifuena onóñedicue. Ñue cue comeci jítainafuena finóñedicue, mei íadi cue comeci éoillafuena áfena finófiredicue.

16 Mei cue comeci jítaiñenafue cue finóadi, afe cue finócafue fiéninana onódicue, mei Juzíñamui Ocuilla uai cuena áfemona rairuúdeza. Iemona afe bie ocuilla uaina nahí ñuera daidicue.

17 Mei daií áfena dama finóñedicue, mei jiáifodo cuemo ite íaifue aféfuemona comuide.

18 Mei onódicueza, dama cuemo ñúefuena iñede. Bíedo daiíacadicue, nanómona cuemo itifue ñúeñede. Mei jii, cue comeci ñúefue finóacade, mei íadi áfena jaca finónidicue.

19 Cue jitaiga ñúefuena finóñedicue; mei íadi cue jítaiñega fiénidifuiaina finócadicue.

20 Iemona cue finóacañega fiénidifue cue finóadi, dama cúeñedeza, cuemo ite fiénidifuemona comuide.

21 Daií jaca bie izói cuemo íoicaide: mei ñúefue cue finóacania, áfena baiño dama cuemo ite íaifuiái báifiredicue.

22 Mei jiáifodo cue comécido Juzíñamui ocuilla uaina gáidicue.

23 Mei íadi afe llezica cue comécimo ite jiáie niné cue úiacade uaina comécido onódicue. Afe uai cue ifoci úrilla ñúefuena niné féitaoide. Afe bie fieni

cue rairuíoide uai cue abímo ite. Afe uai cuena llavéoide.

²⁴ ¡Nai iere íobiñedimedicue! Bie ana tíllamo cue uite abímona, ¿bu oni cue jírecaitalle?

²⁵ Dama Juzíñamui ie Jitó cai Ocuíraima Jesucristodo bífuemona cuena oni jírecaitarede. Iemona, ja birui Juzíñamuina “Iere figora” daidicue. Iemo cue illafue bie izói ite: Juzíñamui ocuilla uai anamo cue itábicaillena dama Juzíñamui jóonega cue comeci ñue úrillado finóredicue. Mei íadi dama cue abi dibénedo nanomo cuemo itífuedo llavécaigacue. Dinómona fiénidifue cuemo íoicaide. Ioicaillamona fiénidifuiaina jaca finóicaidicue.

8

Juzíñamui Ñuera Joreño úicaigamie illafue bie izoide

¹ Mei ja benómona, nana Jesucristomo dájena jaináidinomo duere finótaiti uai jaca iñede. Afémaci Juzíñamui Ñuera Joreño ríinodo afe Joreño illa izói ífirediaíoi. Dáanomo afémaci nanómona comécimo itífuiái izói comeciñediaíoi. Daje izói nánorafuiaina náfueñediaíoi.

² Juzíñamui Ñuera Joreño cai rairuilla uai, dájena Jesucristomo cai jaináinamona, caina ñue cáataite. Afe llezica caina rairuide Ñuera Joreño uai, afe nanómona cue rairuilla fiénide uáimona cuena oni jírecaitade. Afemona fiénidifue ana tíllinomo cuena úiñeite.

³ Moisés ocuica uáimona finónidifueña, Juzíñamui daade ie Jitó ana óriano áfena finode. Afe caimo ite fiénidifue mona oni cai jírecaillafue Moisés ocuilla uáimona finónide, mei nanómona cai comécimo

fiénidifuiái íllado, afe uai rínonideza. Iemona afe uai figo jínoñede. Ie jira Juzíñamui cai oni jírecaitallena, daade ie Jitó jamai cómena bie éniemo jéicitade. Afe mei, cai fiénidifuiái ícoinia cai ifomo Juzíñamui ie Jitó fatátate. Bie izói daina daiíacade, bíniemo ite fiénidifuiái redino comínina íaiói illa izói, afe izói Juzíñamui ie Jitó ana bíniemo orede. Afe bie izoide ória mei, afémie abi, cáie izói eroide, mei íadi afémie íaifuenide. Afe izói ie íllamona afémie bíniédo ua nífuenidimiena jáicaillado nana caimo ite fiénidifuiái ana anáfenode.

⁴ Mei ocuica uai jeire cai óllena, afémie nana bie izói finódeza, mei ja nano cai comécimo comuídifuiái mo comécíñedicaíza. Afena ja náfuéñedicaí. Mei jíáífodo Juzíñamui Ñuera Joreño ífuiái mo comécíioidicaí; aféfuiaína ñue náfueticaí.

⁵ Nano comécimo fiéni comuídifuiái mo comécíidino, daa bie cai abi ífuiái mo izire comécido llícioidiaíoi. Mei jíáífodo Ñuera Joreño ífuiái mo comécíidino afe Ñuera Joreño daináuaimo izire comeci fáíoidiaíoi.

⁶ Da bie cai abi ífuiái mo comeci izire cai llícióia, ana tíillinomo caina uite. Mei jíáífodo Ñuera Joreño daináuaimo izire comeci cai fáíóia, zííñona illífuemo caina uite. Iemo daje izói caina caimare uái illínomo uite.

⁷ Daje bie cai abi ífuiái mo izire comeci llícioidino, Juzíñamui uáitatimacina jáidiaíoi, mei afémaci, nana comíni Juzíñamui ocuilla uaina gáíñediaíoi za. Afémaci áfena gáíñenamona afe uai anamo índiaíoi.

⁸ Ie jira nano cai comécimo comuídifuiái mo jaináidino Juzíñamuina ióbitanidiaíoi.

9 Mei íadi Juzíñamui Ñuera Joreño ja ómoimo íllamona, comécimo fiēni itífuiamo, cuinaca izói, izire jaináñediōmoi. Mei jáífodo Ñuera Joréño dájena iere jaináidiōmoi. Cristo Ñuera Joréño ñédime Cristo íeñede.

10 Cristo ómoimo íllamona ómoimo ite joreño caade. Ua, Juzíñamui anamo ñue jaícina itábicaillamona omoi joreño cazítaga izoide. Mei íadi afe llezica caimo ite fiénidifue cai abina ana tállinomo uite.

11 Mei jáífodo Jesucristo tállanomona Juzíñamui Ñuera Joréño do meine abido cáadimiēna jáitaga. Iemo afe Cristo cáadena jáitate Juzíñamui omoi tífirēna abina nane meine cáadena jáitaitē. Ua ómoimo ite Juzíñamui Ñuera Joréño do Juzíñamui cáadena jáitagamacina ómoīna finoite.

12 Amatiai, mei daí cai comécimo fiēni ífiredifuiamo coméciñellēna, izire ocuícānodicai.

13 Da bie omoi abi ífuiamo omoi coméciōiadi, tállinomo ana ómoīna uite. Bie cai comécimo itifue jaca fiénidifueña caina finótate. Mei íadi afe ómoīna finótate fiénidifue Ñuera Joréño do omoi anáfēnoiadi jaca ninomo cáaitōmoi.

14 Nana Juzíñamui Ñuera Joreño ífócamaci, Juzíñamui úruiai.

15 Mei jii, ómoimo iga Ñuera Joreño, jacire ráiruite joréñoñede. Daje izói ómoimo ite Ñuera Joreño ómoīna meine jacíruiñede. Mei íadi afe ómoimo iga Ñuera Joreño Juzíñamui jitótaiēna ómoīna mamede. Afe Joreño Juzíñamuina “Cue Móodio” caina daítate.

16 Da bie Ñuera Joreño caimo ite joreño diga, dájena nabáizaibite “Juzíñamui jitódicaí” caína daiíllena.

17 Afe daií ie jitótiaína cai íllamona, Juzíñamui raire uícodo caimo lloga feci raa izoide cáimafue maiñóredicaí. Afe cáimafue dama Cristo ie, mei afémie Juzíñamui nahí Jitoza. Mei íadi ja birui áfena daane afémieoiri maiñóredicaí. Afe Cristo duere zefuilla izói, daane birui duere cai zefuíadi, Juzíñamui caína cíote. Iemona Juzíñamui ebíredifueña íemo nitalle izói, afe izói caimo nítaite.

18 Iemona ja biruíllaido duere cai zefuilla figo ráañenamo comeci facádicue. Afefue ráañenari íobidicue. Ua afe aillónedeza áfena lloñédicue: mei afe uire caimo cómuite ñue ebíredifue jamánomoideza. Afe ebíredifue duere zefuíllafue baímo jamánomoideza, afe duere zefuíllafueña úibiñoñeiticaí.

19 Nana Juzíñamui finoca cómena maméñedinuíaí, Juzíñamui jitótiaí meine cáadino jaillano jino cíotalliruimo iere izire úiñoidiaíoi.

20 Ua comínimo ite fiénidifue ícoínia, nana afe Juzíñamui comuítaganuaí zuure fíallifueño mamécaiaíoi. Dani íaíoi jítainamona aféfuemo mámeñegaiaíoi. Mei íadi Juzíñamui daií íaíoina mamede; afe ie comeci jítaina ízoi mamécaiaíoi.

21 Mei afémie nana ie finócanona riire ocuícafueñoña oni jirénoiacade. Daje izói ie finócanona niné táinocaitifueñoña oni jirénoiacade. Afe íaíoi jirénollifueño Juzíñamui ñue comécide. Daií íaíoi oni jirecaitaite, Juzíñamui jitótiaíoiiri ebire jaícina joide cáimafueña íaíoi maiñórilla.

22 Onódicaíza, jaiaí fiénidifue bíniemo

tainéinanomona, nana Juzíñamui finoca cáadinuiai abi izírenari murífrediaioi. Ua jaiáimona nai biruimo, ringo úrue jocóacana llezica izínaila izói, nana ie comínina mámeñega comuítaganuiái izi cácadiaioi.

²³ Daa afémaci izi cácañenaza; daje izói cai izi cácaillano, afe caina jaícina ñúeitalliruido izire ocúriticai, Juzíñamui Ñuera Joreño caimo ite íadi. Juzíñamui icoi aillo caimo fecalle caimátaillifuiáimona, bie Ñuera Joreño fueñe raire uícodo caimo iga. Mei íadi nai bíníemo iere zuure murífredicai; mei Juzíñamui jitótiai maméidicai íadi, móonidiza jíáie come íena náamataja izói, cai ie náamatalliruimo ocúriticaiza. Aféruimo nana fiénidifuiáimona, naa jíáie cai rairuíoide íaifuiári, Juzíñamui cai abina oni jírecaitaite.

²⁴ Afe bie cai jíllollifuemo úiñoidicai. Jesucristo daí caimo llogáuaimo afe jeire cai úamona, afemo úiñoidicai. Afemo daí izire cai úiñoinado jíllotagacai. Cai úiñoga raana cai ciónamona, jae afemo úiñoñeiticai, mei jae íteza.

²⁵ Mei jíáifodo cai cióñena raamo cai úiñoiadi, ja afemo raire járitañoeno úiñoredicai. Iemona Juzíñamui Ñuera Joreño, Juzíñamui jitótiaína cai maméinamo uaina nabaide.

²⁶ Daje izói Juzíñamui Ñuera Joreño mei nifue Juzíñamuimona cai jícallena ñue caina cánuaibite. Juzíñamuimona jaícina ie jitailla izói cai jícajana onóñedicai. Mei daí cai illa llezica, Ñuera Joreño come uaido jino llónide murilla uaido Juzíñamuimo caido izire jícade.

²⁷ Juzíñamui naga come comeci ífueña ñue

onóillena izire jicánofiredimie. Afemona Ñuera Joreño caido daíacanana Juzíñamui ñue onode, mei Ñuera Joreño, Juzíñamuimo jaináidinodo Juzíñamui comeci jitailla izói izire íaioimo jicádeza.

Nana zuure íaifuiaimona caifófeficairedicai

²⁸ Onódicaiza, Juzíñamui nana cómemo ífcaítifuiaina ñue jaícina mamede, nana íena izíruitino ñue íllena. Ua Juzíñamui comeci jítaina izói, ie jíriganano ñue íaioi íllena, Juzíñamui illa dígamíemo cómuitifuiaina ñue jaícina zúitafirede.

²⁹ Mei Juzíñamui nana ie uícodo onóigano nanómona mamede, ie Jitó illa izói íaioi íllena. Bie izói íaioi íllamona Juzíñamui Jitó ámatíaina itííaioi. Afemona aillo ite ámatíai cígímona Jesucristo dama námíena jaide, Juzíñamui jaiái uícodo mámia izói.

³⁰ Nana daíí ie mamécanona, daje izói íaioina jíríte. Nana ie jíriganona, daje izói ie anamo ñue jaícina itábicaítate. Daje izói, nana daíí ie anamo ñue jaícina itábicaítaganomo Crístomo nitaca ebíredífuenta afe izói íaioimo nitade.

³¹ ¿Bífuenta nie izói dáííticai? Juzíñamui cai díbéneo íadi, ¿mei bu caina anáfenolle? ¡Cai anáfenoitena íñede!

³² Juzíñamui dama ie daade nahí Jitona cáimona rairuíñede. Mei jíáfodo nana ñue cai jíllloillena, ie daade Jitó titállena jeruíñeno fecade. Iemona onódicaiza, nana jíáie cai jitaílle ríiduana naa ie Jitóoírri nágarui caimo fecáfíreite.

³³ Juzíñamui nizécamacimo, ¿bu fiénidifuenta nitárena? Afe izói nítaitimie iñede, mei afémaci nífuenidinona Juzíñamui jae jino uáfodo llógaza.

³⁴ Afe Juzíñamui nizécanona, ¿mei bu duere finótarena? Iaioina duere finótaitimie jae iñede, mei Jesucristo íaiói ícoinia tíizaibiteza. Afe baimo Jesucristo tíllanomonona meine abido cáadimiena jaillano, Juzíñamui nabézimo ráinazaide, dinómona Juzíñamuimonona cai ie canóllifuenta izire jicállena.

³⁵ Cristo cai ie izíruillana, ¿bu mei féitarena? ¿Meita duere cai zefuádi, Cristo caina izíruillana féitaite? Féitanide. ¿Meita llotáiredifuiái caina ie izíruillana féitaite? Féitanide. ¿Meita fienu caina finócadino caina ie izíruillana féitaite? Féitanide. ¿Meita júbietaillafue caina ie izíruillana féitaite? Féitanide. ¿Meita inícuironinafue caina ie izíruillana féitaite? Féitanide. ¿Meita jácifuiái caina ie izíruillana féitaite? Féitanide. ¿Meita tízaillafue caina ie izíruillana féitaite? Féitanide.

³⁶ Juzíñamui Cuega Uai bie izói dáideza:

Nágaruillai o ícoinia tíllanomo áinozitagacai, mei íadi tíiñedicai.

Daje llezica caina titalle ovéjaiai izói mamédiaíoi.

³⁷ Mei íadi nana bie zúuredifuiáimonona, caina izíruitimie Jesucristodo, caifófeficaidino baimo ñue jino jáidicai.

³⁸ Iemonona ñue onódicueza, Juzíñamui cai ie izíruillana ráiruitena iñede. Naga raamo cai jíriadi Juzíñamui féitañeno caina izíruioide. Cai tíllifue Juzíñamui caina izíruillana cáimonona feitañeite. Daje izói biniemo cai cáanafue caina ie izíruillana cáimonona rairuínide. Daje izói Juzíñamui abi imaci

caina ie izíruillana cáimona rairuínide. Daje izói fieni ríinorede jóriaí caina ie izíruillana cáimona rairuínide. Daje izói biruido comuídifuiaí caina ie izíruillana cáimona rairuínide. Daje izói uire cómutifuiaí caina ie izíruillana cáimona rairuínide. ³⁹ Daje izói Juzíñamui abi imácimona ríillaini caina ie izíruillana cáimona rairuínide. Daje izói Taifemo jaináidino ríillaini caina ie izíruillana cáimona rairuínide. Ua nana Juzíñamui finócanuiaimona buna Crístodo caimo jino cíotaga izíruillana cáimona rairuínide.

9

Juzíñamui jaiái úicodo Israel nairái nizede

¹ Ja birui jááfue ómoimo llóiticue. Crístomo cue jaináinamona táinona llóñeiticue. Daje izói Juzíñamui Ñuera Joreño nabáioicaigacueza cue comeci urilla uai ñue jino deide. Afedo bie cue lloífue nahí ua ráfueza, onódicue.

² Be ñie: nana cue nairái comíniri iere zúuruiticue. Afémaci Crístomo ñnoñenamona zúufueri comécina cuidíridicue.

³ Iemo mei cue dáinamona ñibai afémacina jíllotareniadí, Juzíñamuina, “Maí fieni cue faido,” ñibai raire dáititcue. Mei íadí cue daína izói Juzíñamui cue faidódena, cue nairái imácina cánoñeite.

⁴ Afémaci jaiái Juzíñamui nizécamie Israel, méifomo comúicana jáidino. Daje izói afémacina Juzíñamui daide:

—Bimaci cue nairái, —daide. Afe mei íaioi cígimo ie íllado íemo ite áillue ebírede ríino Juzíñamui

íaiõimo jino ciótate. Daje izói íaiõina ie ñuera finóllifuiái Juzíñamui íaiõimo llote. Iemo Juzíñamui Moisédo ocuica uaina llogáiaioi. Daje izói Juzíñamuina nahí caimátaitajana onótagaiaioi. Daje izói Juzíñamui lloga caimare íaiõi illíuui íaiõimo íteza.

⁵ Bimaci mámecina jica jalleide judíuai jaiáidigimamona comuítagano. Iirainomo íaiõi náiraimona Cristo cómena jócuai biga. Bífuiamona Juzíñamui naga ráfuiái jamánomo ocuillana onódicai. Iemona nana náiraiamona illa dígamiaí Juzíñamuina jaca ninomo fáicanocaiño ióbitarediaioi. Mai daí íteza.

⁶ Díga ñúefuiái cue náiraimo duide; mei íadi Crístona náfueñediaioi. ¿Mei níbai? ¿Níbai Juzíñamui uícodo lloga Israelna ñuera daináuui figo déizaibiñede? Daí daíñedicueza. Jiáifodo jóide. Nana Israel náiraina maméidinomona dáarie Juzíñamui nizeñegano.

⁷ Daje izói Abraham méifomo comuídino dáarie ie nahí úruiaíñediaioi. Jaiái uícodo Juzíñamui Abrahana daide:

—Dama Isáacimona cómuitino o uáfuenta méifomo comuídina jaille, —daide.

⁸ Bie uai jiáifuena cai onótateza: Dámie ñuera náiraimo jócuado, dama áfedo “Juzíñamui jitódicue” daínide. Mei jiáifodo Juzíñamui uícodo daina uai fúitamona jocócana, dama afémaci ie uáfuenta méifomo comuídina mameina.

⁹ Juzíñamui Abrahana uícodo daina uai be ñie: “Uire afe nauí cue mamécaruimo meine bíiticue; íemo o ai Sara jitó jócoite,” daide.

¹⁰ Iemo nai jiáifuena ite. Rebeca jitó íaillinoi

dáamiena móorediaillinoi. Iaillinoi moo cai jaiáidigima Isaac. Afe jító íaillinoi guarázaillinoi.

11-12 Mei íadi íaillinoi nai jocóñeniadi, afe ménaillinoi nai níifuenina illa llezica, Juzíñamui Rebécana daide: “O jító nánoramie ie méifoide ama anamo jabóidimiena íite.” Juzíñamui daií daide, bífuená cai onóillena: Afe iaillinoimona dáamiena Juzíñamui nizéllena dama Juzíñamui comeci jítaina izói mamede. Afe Juzíñamui íaillinoimona dáamie níziafue íaillinoi finócafuemona comuíñede. Dama Juzíñamui mámiamona íaillinoimona dáamie nizécamiéna jaide.

13 Juzíñamui Cuegáuai bie izói daide: “Jacob cue nizécamié, íemona cue izíruigamié, mei íadi Esaú cue ruifruigamié.”

14 Iemona dáarie nibai dáítiaioi: “Juzíñamui daií dáamiena fia ruifíruillano jáímie nizeda máiñua jaícina jóiñede.” Mei íadi bie comini daináuai uáfueñede; jaícina jóiñedifuená Juzíñamuimo jaca iñede.

15 Mei Juzíñamui Moisená ja dáideza: “Daa cómemo cue dúecaiacaniadi, afémiemo dúecaiticue. Daje izói daa cómena duéruillano riire íbana cue óiacañeniadi, íemo íbana óñeiticue.”

16 Bie Juzíñamui daína uáimona onódicaiza: Juzíñamui dáamie eneno nízia afe come óiacanamona daingo comuíñede. Daje izói afe come riire fínuamona Juzíñamui níziafue comuíñede. Juzíñamui afémié nízia dama cómemo Juzíñamui dúecaiacanamona comuide. Daje izói afe ímana ie canóacanamona comuide.

17 Mei jii, Juzíñamui ie Cuegáuaido, Egipto

illáimana daide: “Ja illáimana o jóneticue, cuemo ite áillue ríino jiáimacimo odo jino cíotallena. Afe llezica iere duere o cue finólledo cue mámecei naga náiraiado jica jalléitaitio,” daide.

¹⁸ Ie jira onódicaiza: Juzíñamui dama ie óiacana izói, daa cómemo dúecaite; íemo Juzíñamui dama ie óiacana izói jiáie come comécina ríireitaite.

¹⁹ Bífuiaimona daa come nibai cuena jicánoite: “Mei Juzíñamui afe ie óiacana izói finófiredeza, jiáfodo índicai. Iemona ¿nibái mei fiénidifue ícoinia caimo nitáfirega? ¿Bu mei Juzíñamui óiacanafuena uáitarena?”

²⁰ ¡Aci! ¡Dai! dainámie cacai! ¿O iere ua ímiedicue daidio, Juzíñamui riire júfidollena? Mei nana Juzíñamui comuitagacaiza bie jiáifuemo coméciri. ¿Mei nibai nogo, afe nogo niraíngona dáite: “¿Nibái mei cuena bie izói nitio? ¡Dáiñeite!

²¹ Nogo niraingo daingo ie comeci óiacana izói afe nogóraina nírede. Afe daje nógorafella átuedo daa ebire eroide icíruna nírede, íemo daje nógorafella enéfenemona jamai nogócirina nírede.

²² Iemona daje izói Juzíñamui finócafuiaí ñúeraza, onódicai. Afémiemo ínoñedinona Juzíñamui duere finótaacade, íemo ite fiénidifuena gáíñenana jino ácatallena. Afe llezica íemo ite aillo ñuera ríino jino comínimo onótaiacade. Mei íadi afémaci fiени illafue íbana raire otáañede. Ie icírafue anamo itínomo, Juzíñamui raire comeci járitañede. Iaióimo dúide niné táinocaitallifuena nai are ocuñede.

²³⁻²⁴ Daje izói Juzíñamui ite jamánomo ñuera ebíredinona comínimo jino onótaiacade. Iemona Juzíñamui dáarie judíuai, daje izói dáarie

judíoñedinona nizeda íaioimo dúecaide. Dúecaillano íaioi fiени illafue ibana oñeno íaioi jíllotate. Afe ie dúecaillado nizécanodicaí. Afémie jaiiai uícodo, íemo ite ebíredifuemona afe cáiena oni cai maiñóllena caina mamede. Daií fínuamona, íemo ite jamánomo ñuera ebíredifuiiai Juzíñamui caimo jino fidítate.

²⁵ Jaiiai Juzíñamui uai jino llóraima Oseas cuegánicomo Juzíñamui bie izóí daide:

Cuemo jaináíñede comínina “Cúeiena” náamataitícue.

Daje izóí nauí cue izíruiñega náiraina “Cue izíruiгамacina” mámeitícue.

²⁶ Daje izóí batí jíáie éniemo itínona Juzíñamui daína “Cue comíníñediomoi,” afénomo itínona “Cáataite Juzíñamui jítoítaína mamélliaioi,” —daií Oseas daide.

²⁷⁻²⁸ Mei íadi Israel nairai dibénemo Isaías daide: “Israel comini iere aillo jebuídiaioi, ua monáillai fuédamo ite facádonide guamájiiai izóí, jamánomo áillomaci. Mei aillo jebuídiaioi íadi, afe náiraímo Juzíñamui raire duere finótalle mei, daa dúemacina fiébitiaioi. Dani afe dúemaci jíllotiaioi. Mei jíi, Juzíñamui ie daína uai izóí náiraina duere zefuíllifue jino zuítaite.”

²⁹ Dáamie Isaías afe duere zefuíllifue uícodo llote: Mei jamánomo ríinorede Juzíñamui, caina due méifomo cómuitinona níiriñeniadi, Sodoma íemo Gomorra diga jofue nairai niné táinocailla izóí niné táinocaiticaí, —daide.

Jesucristo cai jíllotalle ñúefue daje izóí Israel comínimo dúide

30 Cai lloga uaillai bie izói daiíacade. Be ñue: Judíoñedino Juzíñamui anamo ñue jaícina íaioi illínona figo jenóñediaioi, mei íadi Juzíñamuimo íaioi ñnuamona, Juzíñamui anamo ñue jaícina itátagaiaioi.

31 Mei jiaífodo afe Israel nairai, (judíuaina maméidino) Juzíñamui anamo ñue jaícina íaioi itátaite ocuilla uállaina jenódiaioi, mei íadi afe uállaina ñue ícoimo figo dúcitañediaioi.

32 ¿Ñibái mei afeno baiñediaioi? Mei Juzíñamuimo ñnuado íaioi comeci ñue jaícina jóillifuena jenóñediaioiza. Dani íaioi nícidogafuiaimo comécidiaioi. “Ñibai aféfuiaido Juzíñamui anamo ñue jaícina íitícaí,” daidíaioi. Ie jira Juzíñamui oreca jílloitaimiemo, ñue Jesumo, uíeco riire finódiaioi; ñnuano Juzíñamui anamo ñue jaícina iñediaioi. Come iodo jáiadi éicitaila izói, Jesumo éicitaidiaioi. Afémie iomo éicitaitate nofici izóidimie mei afémie ñúemie, mei íadi ruifíruigamie.

33 Juzíñamui Cuegáuai afémie dibénedo bie izói úrite:

Omoí cácarei, judíuai iomo éicitaitate nofici izóidimiena jóonetícue.

Afemo comini éicitañillano oni ñibéfodo báitíaioi.

Mei íadi nana íemo ñnotino íena méairuíñeitiaioi.

10

1 Cue ámatíai, nane ómoína dáitícue: Cue nairai israelitas imaci jílloillena, nana cue comécido izire óiacadícue; íemo áfena Juzíñamuimo jicáfiredícue.

2 Bie ñúefue afémacimo nitáredícue: Juzíñamui comeci jítainafuemo nágarui iere járidofirediaioi.

Mei íadi áfena ñue jaícina íaiói fidíñenamona daií táinomo járidotíaiói.

³ Comini Juzíñamui anamo ñue jaícina ie itátallifuena, íaiói ifócimo ñue denóñede. Mei jiáifodo Juzíñamui anamo itábicaíñeno dani íaiói mameca comeci ñue jaícina jóitaitifuemo járidotíaiói. Ie jira Juzíñamui lloga ñue jaícina itátaitifuena maiñóñediaói.

⁴ Mei jii, Cristo billano nana íemo íinotino Juzíñamui anamo ñue jaícina itátagaiaíaiói. Ie jira comini Juzíñamui eróicana ñue íaiói íllena, Moisés ocuica uaimo dani íaiói níciduafuena Cristo jae féitate.

⁵ Ocuica uai jeire úado Juzíñamui anamo ñue jaícina cai illifue dibénemo Moisés bíena daide: “Nana ocuica uailai dáamie ñue ícoimo fuitáadi, áfede afémie are iite.” Mei íadi afe uáillaina ñue jeire otímiena íñede.

⁶ Mei jiáifodo, Jesumo cai íinogafuedo Juzíñamui anamo ñue jaícina cai illífuena Juzíñamui Cuegáuai bie izói daide: “O comeci anado bífuena daií jicánoñeno iri: ¿Bu mei caifo monamo jaille, Cristo ana cai jíllotataíbillena?”

⁷ Daje izói bie jiáifue daiíñeno iri: ¿Bu mei ana tíidino illánomo jaille, afénomona Cristo caina caifo jíllotataíbillena?”

⁸ Juzíñamui Cuegáuai bie izói daide. Be ñie: “Aci, Juzíñamui jíllotaja uaina ja cacádiomoi. Ie llógamo ja comécidiomoi.” Bie uailai ómoimo cai lloga omoi íinollifue. Be ñie:

⁹ O fúedo jino comínimo “Jesús cue nahí

Ocuíraima,” o daiíadi, nane daje llezica afémié tíllanomona meine abido cáadimiena Juzíñamui jáitagamiemo o comécido o ínoiadi, ua jíllotio.

¹⁰ Mei Juzíñamui anamo ñue jaícina cai itábicaillena, afémiemo comécido ínoredicai; ie mei Jesucrístomo nahí cai jaináinafuenta, cai fúedo jino comínimo llóredicai, áfedo ñue cai jílloilena.

¹¹ Juzíñamui Cuegáuai daide: “Nana íemo ínotino íena meáiruiñeite.”

¹² Jesucristo nana náiraímo daje uaido úrite. Judíoñedinona énenoruiñeno daje uaido íaioímo úrite, naa judíuai diga. Nana nairai Ocuíraíma daade Jesucristo; nana afémiemo jicádinomo afémié jaca dúecaífirede. Ja ie jira íemo ite jamánomo ñúefuiaímona íaioímo fecáfirede.

¹³ Mei Juzíñamui Cuegáuai daií daídeza: “Nana cai Ocuíraíma Jesucrístomo jícaítino jíllotiaioí.”

¹⁴ Mei íadi Crístomo nai íaioí ínoñeniadi, ua afémiemo jicánidiaioí. Daje izóí afe jíllolle uai nai íaioí ñue cácañeniadi áfemona nai ínonidiaioí. Iemo afe uai jino llóraíma nai íñeniadi, afe uaina ua cacánidiaioí.

¹⁵ Afe izóí, uai jino llóraímana nai íaioí ocuñeniadi, afe ñúefue uaina ua jino llónide. Jira Juzíñamui Cuegáuai bie izóí llote: “Núefue lluaíbitimie billa iere ñuera.”

¹⁶ Mei íadi nana cue nairai imaci, Cristo daina ñúefuena jeire oñédiaioí. Jaiái uai llóraíma Isaías dama bie izóí daide: “Ocuíraíma, cai lluaíbigafuena ¡jaca buna ínoñena!” daide.

¹⁷ Aféfuiaímona bie izóí onódicai: ñúefue fidínamona comíni ínotinona jáidiaioí. Iemo

dáamie Cristo daina uai jino lluaíbillamona, comini afe ñúefuena fidídiaioi.

18 Mei íadi jicánoticue: ¿Mei nı́bai nana judı́uai afe ñúefuena fidíñediaioi? ¡Ieñede! Ja fidídiaioi. Juzı́ñamui Cuegáuai daje izóı lloste:

Afefue llóraini úrilla uai nana énie náıraiaıdo cácaıde.

Iaioi daináuailıai nana énie fuédamo jıca itınuiaımo ñue jalleıde, daıde.

19 Dánomo nane jıáıfuena jicánoitıcue: ¿Mei nı́bai afe cacánafue Israel comini ifócımo nai figo déıñede? Dáamie Moisés, Juzı́ñamui dibénedo fueñe uai ote. Moısedo Juzı́ñamui daıde:

Ua comıniñedımacımona ómoına úradoıtaitıcue.

Daje izóı abına onóñede nairai ícoınia ómoına icırıtaitıcue, daıde.

20 Afe mei Isaías jacıruiñeno Juzı́ñamui dainafue llote. Be ñıie:

Cuena jenóñedıno ja cuena baitıaıoi.

Cuena jicánoñedıno dama cue abına ja onótaitıcue, daıde.

21 Israel nairai dibénemo Juzı́ñamui daináuai Isaías llote. Be ñıie: “Nágaruıllaıdo cue uaina náfueacañedınona uáıdotıcue. Mei íadi fairıoñediaioi. Daje izóı cuena uáıtaoidınona uáıdotıcue, mei íadi náfueñediaioi,” daıde.

11

Israel náıraımona dáarıe jıllıoitıaıoi

1 Iemona nane jicánoticue: ¿Ja nı́bai Juzı́ñamui ie nızeca Israel náıraına ruıfıruıga? ¡Jaca íeñede! Mei cue dama Israel nairai ímıedıcue. Daje izóı

Abraham izíedicue. Iemo Benjamín comínimona comuídicue.

² Jaiái ninomo uícomo íeiēna onoiga Israel comínina birui ruífiruiñeite. Uáfueza, uai llóraíma Elías daina uaina onódiomoi. Aféuai Juzíñamui Cuegánicomoi ite. Juzíñamui Elías jícaja llezica, Israel nairai fieni finócafuiai íaíomoi riire jitade. Daíde:

³ “Cue Ocuíraíma, o uai jino llóraínina fatíaiomoi. Daje llezica o íóbitalle illánuiaina niné táinocaitatíaiomoi. Afemona dama cue fiébilla. Iemo daje izói nane cuena titáacadíaiomoi,” daíde.

⁴ Mei íadí Juzíñamui ie uai fairíote: “Siete mil dígamaci eneno cúeiēna ja níiriticue. Afémaci afe taino juzíñamui Baal jánarai anamo caiñici ifodo dújuñediaíomoi, ie íóbitallena,” daíde.

⁵ Ie jira daje izói birui judíuaimona íinote dúemacina eneno mamécaíaiomoi. Juzíñamui nana comínimoi dúecaillano daa bimácina oni eneno nizede.

⁶ Bie níziafue Juzíñamui caímo dúecaillamona comuide. Iemona come finóacanamona comuíñede. Mei íadí cai níziafue come finóacanamona comuídeniadi, Juzíñamui caímo dúecaillafue nahí caímare dúecaillafueñede.

⁷ Bie daináfue ¿mei nífuena cai llote? Be níie: Israel comíní íaíomoi jenoca Juzíñamui anamo ñue jaícífuena baiñediaíomoi. Mei íadí Juzíñamui nizeca dúemaci afe íaíomoi jenócana otíaiomoi. Ie mei baiñédimaci Juzíñamui íaíomoi comécina riiretade.

⁸ Juzíñamui Cuegáuai daí daíde: “Bimácina Juzíñamui comécina tíidino izói finode. Uina

cíoiñedino izói íaioina finode. Daje izói jefona cacáiñedino izói íaioina Juzíñamui finode. Nai afémaci jaca biruíllaimo bie izói itíaioi.”

⁹ Iemo jái David Juzíñamuimo jícajano daide: Juzíñamui ióbitallena íaioi finoca güilláfuiái táinona finódiaoi.

Afe jira Juzíñamuina daidicue: Mai duere íaioi finoiri.

Iemona aféfuiái tácofo izói íaioiimo jáiteza; daje izói llójeji izói jáiteza.

Afe táinona finócafuiaimo éicitallano izói duere finólliaioiza.

¹⁰ Daje izói uina nirídino izói mai mei íaioi jáilleza, Juzíñamui ñúefuiái íaioi ónoñeilleza.

Iemo nágarui iere baizídaitaganona íitiaioiza, daide.

Judíoñedino jílloafue

¹¹ Ja birui nane jícanoticue: ¿Ja níbai judíuai íaioi éicitallamona niné nana táinocaitalliaoi? ¿Jaca iñédeza! Mei jíáfodo judíuai Juzíñamui lloga uaina cacáacañena llezica, judíoñedino aféuai cacáillano íaioi jíllloillifue maiñódiaoi. Afe íaioi máiñua Israel comínina úradoitate, afe jíllonafue otino illa izói íaioi íllena.

¹² Iemona judíuai íñoñenafue íirainomo nana náiraiaina canode. Afe judíuai ícoimo fuitáñeno zóofenocaillafue, judíoñedinona ñue canode. Mei íadi judíuai meine abido Jesumo ínuuilla llezica, nana náiraiái jamánomo ñue ézicilliaoi.

¹³ Ja birui judíoñedinomo úriticue. Mai omoi cácarei. Mei judíoñedinomo ñúefue llujállena Juzíñamui orécacueza, afe bie cue llócaillifueimo iere járitaifiredicue.

14 Nibai áfemo riire cue táijnamona, cue nairai comini, omoi illa izói íacaitiaioi; afe izói íaioi íllena jitáidicue. Afemona afémacimona dáarie ñue jíllobicitiaioi.

15 Mei Juziñamui judíuai ruifíruillamona nana jiáie nairai Juziñamuimo comeci caimare uái illáfuenta llogáiaioi. Iemo uire judíuaina íaioina Juziñamui caimare dáanomo uáidua llezica, iere jamánomo caimare nana íiticaí. Ua aféruimo tíide meine abido cáadena caimare illa izói caimare íiticaí.

16 Mei jii, Abraham Juziñamuimo dúinamona, nana ie anamo comuíoicaidino Juziñamuimo dúidiaioi. Daje izói da amena jáinao Juziñamui íeiena maméiadí, daje izói nana afe amena ícairuai Juziñamuimo dúide.

17 Mei íadi dáarie Abraham anamo comuídino íaioi íinoñenamona Juziñamui comínina íñeillena ruifíruigaiaioi; íemo ie uai jeire omoi úamona Juziñamui comínina itátagaomoi. Afe ruifíruigamací ifomo jae jónegaomoi; jóneficaillano Juziñamui Abraham imácimo lloga ñúefuiai daje izói llíinoredíomoi. Ie jira judíuai ñuera olivo amena naa ie ícairuai diga izóidiaioi. Iemo omoi nano fueñe jazicí amena ícairuai izóidiomoi, mei judíoñediomoi za. Jae judíuaimona dáarie íaioi íinoñenamona amena ícairo jaitaina izói jaitácaiaioi. Afe mei omoi ínuamona afe jaitácacairuai méifomo jónegaomoi. Ua, jaiái jaitaca ícairuai jiáie aménamona méifomo zicóllena jónegano izóidiomoi. Birui daje moi ícoraimo jaináidiomoi. Afe ñuera olivo íjido cáadiomoi.

18 Ie jira abina ínoñeno iri. “Olívomona jaitaca

ícairuai izóidimaci baímo ñúeracue” daiñeno iri. Afe izói daiñidiomoi, mei ñuera olivo moi ícoraiaina cáatañediomoiza; dani jiáinamona zicóllena jóonega ícairuai izóidiomoi. Mei uáfueza, dani Juziñamui nizeca comínimo birui omoi jaináinamona ie lloga ñúefuiai llínorediomoi.

¹⁹ Nibaí dáamie dáite: “Dáarie afe ñuera olivo ícairuai jaitácaiaioi, afe méifomo cue jóonellena”.

²⁰ Jiáinamona ñuera olívomo zicódiomoinia ñuera, mei íadi jaitaca izóidimaci jiáifo joide: Juziñamuimo íaioi ñnoñenamona jaitácaiaioi. Dani omoi ñnogafuemona jóonegaomoi. Iemona áfedo dani abina ñnonidiomoi. Mei jiáifodo omoi jaitábiza abina ñue omoi rairuiri.

²¹ Mei Juziñamui nano nizécanona figo íaioi ñnoñenamona jiziñeno íaioina ruifruite, afémie daje izói omoi figo ñnoñeniadi, amena ícairo jaitaina izói, jiziñeno raire ómoina ruifruiteza.

²² Mai bífuego omoi coméciri. Juziñamui daií omoi jóoniano iere ñuera. Afedo afémie ómoimo dúecaifrenana fidídiomoi. Mei íadi nane afémie iere riire jaícina ocuidimie, mei ie uaimo náfueñedimacina afémie iere duere finode. Mei jiáifodo afémie ómoiri dúecaifrede. Iemo fáicanocaiñeno ie uaina jeire omoi oíadi, ie dúecailla dibénedo ífireitiomoi. Afefue jeire omoi óñenia, jiái ómoina afémie jáitaite.

²³ Mei jiáifodo judíuai nane abido ñnoia, afémaci abido dáanomo jofó jóonelliaioi. Mei Juziñamuimo meine íaioi jóonelle riino ite.

²⁴ Mei omo judíoñediomoiza, jica ite onínemaci izóidiomoi; Juziñamui comínimo due jiza

dúñediomoi. Daií omoi illa llezica Juzíñamuimo omoi íñuado, afémie ie comínina ómoína itátate. Ie jira nano fueñe ie nizécamacimona oni nibéfodo baídino íaioi íñoiadi, abido daje ie comínina itátallena, Juzíñamui dibénedo jamánomo juánide.

Irairuillaido Israel nairai jílloitiaioi

²⁵ Amatiai, omoi cacai. Afe olivo amena ráfuenta ja ómoimo lloticue, uáfodo ónoñega Juzíñamui mamécafuena comécido omoi onóillena. Juzíñamui nanómona comécido mamérillafuena ómoína fidítaiacadicue. Aféfuena ónoillano Juzíñamui comínina omoi itátagafuedo abina íñoñeitiomoi. Juzíñamui mamérilla fue bie izói joide: Juzíñamui Israel nabémacina comécina riire finode, mei íadi nano íanori íaioi comécina riiretade. Iaioi comeci riireta mei, Juzíñamui nana jíaie náiraina caimare uáidote, íaioimona nana Jesumo ínotino nizéllena.

²⁶ Nana Juzíñamui óiacana dieze íemo ínotimaci ofille mei, nana Israel nairai jílloizíitiaioi. Mei Juzíñamui Cuegáuai daií daide:

Cai Jíllotaraima dani cáimona cómuite.

Afémie Jerusalén jófuemona biite. (Afe jofue jíáfodo Sióna mameide.)

Jacob meifo igímaiai íaifuiaína afémie múíñoite.

²⁷ Iaioi fiénidífuiai oni cue dolle mei nana uícodo cue lloga ñúefuiai ñue fuite, daide.

²⁸ Nana comini jílloille uai dibénedo judíuai fairíoñediaioi. Iemona judíuai Juzíñamui ruifíruigaza, ie bacáuai imácina jáidiaioi. Ie bacáuai imácina íaioi íllamona Juzíñamuimo cai nabáirillino

comuide. Mei íadi Juzíñamui nai íaiõina izíruite, íaiõí jaiáidigimaíai ie nízia jira.

²⁹ Mei uáfueza. Juzíñamui ja ie fecaca raana abido bairóñede. Daje izóí cai ie uáiduafuena jaca jíáfodo méidoñede.

³⁰ Nauí Juzíñamui uaina íñoñediõmoí; mei íadi jíái birui judíuai daje izóí íaiõí íñoñenamona Juzíñamui ómoíri dúecaizaide.

³¹ Ja birui nano áinori judíuai Juzíñamui uaina íñoñediaõí, Juzíñamui ómoímo dúecailla izóí íaiõímo dúecaillena.

³² Bie uáillaimona bífuena onódicai: Nana jíáie comíni ie uaina dájerize íñoñediaõí. Ie uaina cai íñoñenamona fiénidifuiái finófiredicai. Iemona Juzíñamui nana caina dájerize cai gaíga fiénidifuiáimo llaveca izóidinona jóonete. Afémie bie izóí caina daide, afe méifomo afémie nana caimo dájerize dúecaillena.

³³ ¡Diga Juzíñamui ebírede comeci ífuiái caimo ie dúecaillena, naa ie onóigafuiái diga! ¡Afémie iere ráfuena baitádimie! Uícodo ie mamérrillafuiáina cai jino llónidicai. Daje izóí eneno dáarie comínina ie níziafuiáina, onóñedicai.

³⁴ Cai Ocuíraíma comeci úrillafuiáina buna onóñede. Daje izóí afémiena bu llófuetimie íñede.

³⁵ Iemo jíái cai Ocuíraímamo raana izájitimie íñede, afe raa íba llínollena.

³⁶ Mei nana ráaniai Juzíñamui comuítaga. Nana afémie finoca; daje izóí íeiena nana finode. Jaca zííñona Juzíñamuina íóbioitaredicai. Aquíe izóí íteza.

Juzíñamuimo ñue jaícina cai dúina uai

¹ Cue ámatiai, birui Juzíñamui caina dúecaillamona, ómoimo izire jicádicue. Dani omoi mai Juzíñamui anamo itábicaíri. (Dani omoi comeci gáinafue finóñeno, mai Juzíñamui comeci jítainafue omoi finori, cai ie ocuilla izói.) Juzíñamui ióbitalle rille jaiiai íemo jaiiai feca izói, nai omoi caana llezica, Juzíñamui anamo dani omoi mai ñue itábicaíri, íena ie ñue facátagamacina omoi íllena. Afe llezica dama íeíena eneno ñue finócamaci omoi íllamona, omoi ie ocuilla uai, mai jeire omoi oíri. Nana bífuiai ñue cai fínuamona, cai joréñodo Juzíñamuina caimátaitadicaí.

² Biniemo ite comini comeci táinomo facáoidiaíoi. Mai, afe izói omoi íñeno iri. Mei jíáfodo, omoi comeci ífuiai, mai jíáfodo méidori. Daií omoi comeci ífuiai omoi méiduamona afe izói Juzíñamui nana o illafue cómofuena méidoite. Afemona Juzíñamui comeci ñue jítainafue ónoiticaí. Daje izói ie jitaina ñúefue ónoiticaí, naa ie cai ióbitallifuiari. Daje izói ie ciona jaícina jódifuiaina ónoiticaí.

³ Juzíñamui cuena dúecaillano cuemo jóonegafuedo, nana ómoína dáiticaí. Juzíñamui cai fibítajafuemo da comécina facáredicaí. Afedo abí cai ínolle ñuera. Mei íadi afefue baimo táinodo ínonidicaí. Iemona nana ómoimona dámie, afefue baimo dama ie abina íñoñeno iri. Mei jíáfodo illa dígamie comécina ñue jaícina facárede, Juzíñamui íemo lloga ie comécimo Juzíñamui comuítaga ínuafue daína izói.

⁴ Da come abimo aillo táijide ráaniai ite. (Onoi jíáfodo táijide. Daje izói idai táijina jíáfoides. Daje

izói fue táijina jiáifodo joide. Daje izói jefo táijina eneno jiáifodo joide.) Mei íadi daade cai abi íadi. Naga cai abimo ite raa eneno jiáidofodo caina canode. Daje táijinamo iñédiaioi.

⁵ Daje izói, áilloziena Jesumo ínoticai. Aillo cióidicai íadi, daade abi izóidicai. Ua, Crístomo dájena cai jaináinamona, dáamiede abina iticai. Dáamacidicai. Afe llezica dáamiedicai abimo ite táijide raa izói, dani conímamo dájena jaináidicai.

⁶ Naga cómemo Juzíñamui jóonega táijinana fibíllafue jiáifodo joide. Juzíñamui comeci óiacana izói, afémie naga cómemo fecade. Bie táijinana fibíllafue ñue jeire óredicai. Dáamiemo Juzíñamuimona onoiga uailai jino llóllena fibítaga. Afemona áfena afémie rairuíño jieruirede. Nano ie ínogafue íllaze jino llófuerede.

⁷ Jiáimaci cai canófireille fibíllafue Juzíñamui caimo jóoneiadi, áfedo rairuíño canóredicai. Daje izói llófuiana fibítagamie, afe ie llófuefirenamo ñue járitairede.

⁸ Afe izói jiáima comécina náiretallena fibítagamie, áfemo afémie ñue járitairede. Daje izói comini canolle raa fécafiredimie, afe ibana ie maiñóllemo coméciinide. Fia íaioimo dúecaillano fecádenia ñuera. Afe izói comini jetállifuenta ocuídime caimare abi rairuíoicana ocuírede. Duéredino canófredimie, caimare íaioina canórede.

Jesumo ínotino fínórede uai

⁹ Táinona lloñoeno conímama izírui. Íafue bai oñoeno iri, mei íadi ñúefue jeire omoi oíri.

10 Jiáimana caimare nahí ama izói izírui. Afémiemona raire uícoficaiñeno iri, mei jiáifodo méifomo fiéñeno raire íena o uícodo o otátari.

11 Ráiraieñeno jiere omoi iri. Ñue naire cai Ocuíraimamo omoi táijiiri.

12 Cai ocuírinafueмона caimare omoi ífireiri. Duere omoi zefuíadi, áfemo raire járitaiñeno, fíaicana caimare úriri. Juzíñamuimo úrillana jaca féitañeno iri.

13 Jesumo ínotino jitailla raana, íaioi canóllena jeruíñeno fecari. Nana omoi jofomo uáiduaíbitinona caimare uáidori.

14 Omoi fiени finódinona ñue caimátaitari. Íaioi ibana fiени faidóñeno, íaioi cáimafuiaí Juzíñamuimona jicari.

15 Caimátaidino diga caimare omoi iri. Daje izói raamo jíridinomo omoi dúecairi. Eedino diga omo eeri, íaioi fírallena.

16 Conímana úradoiñeno iri, dájena illa dígamíemo ñue coméciri. Daje izói fiени abina ínoñeno iri, mei jiáifodo comécina mánaidino izói omoi iri. “Íere baitádimíedicue” comécido daíñeno iri.

17 Da come fiени omo finóadi, afe ibana afémiena fiени finóñeno iri. Mei jiáifodo, nana comini eróicana iba oñeno ñue o finori.

18 Omoi illa dino, nana comini comeci jacíruiñenafuedo caimare uái omoi iri.

19 Cue izíruiга ámatiaí, fiénidífue comuíadi, ibana omoi oñeno iri. Mei íadi aféfuena fáicanocairi. Afémié Juzíñamui duere finólleza. Mei jii, Juzíñamui Cuegáuai daide: “Duere finóllifue cuemo dúideza. Daje izói cue iba ólleza. Daí cai Ocuídime daide.”

20 Nane dánomo daide: “O bacáuai ímie jufíruia, icíñeno íena ecari. Iemo afémie jiróacaniadi, ie o jirótari. Bie izói ie o fínuamona, izire íena méaicaitaitio,” Juziñamui Cuegáuai daí daide.

21 Fiénidifue omoi anáfenuamona abí omoi rairuiri. Mei jiáifodo ñúefue jeire omoi úado, fiénidifuena mai omoi anáfenori.

13

1 Nana comini omoi jamánomo ocuídillaima ocuica úiñotillaini anamo ñue omoi itábicairi, mei nana ocuídillaini Juziñamui jónegaza. Afémie jóneñega ocuídimienna iñédeza.

2 Iemona afe úiñotillaimana uáitaidimie Juziñamui jónegamienna uáitate. Nana daí uáitatino, afe ie uáitaja ícoinia afémacina Juziñamui duere finótaite.

3 Mei jii, ñúefuena jeire ófiredino ocuídillainina jacíruineitiaioi; mei jiáifodo fieni finódino jacíruillena jónegaiaioi. ¿Meita ocuídillaimana jacíruñedimienna íacadio? Mai ñúefuena jeire o oíri. Iemona aféllaima “Facátagamiedio” ona dáite;

4 mei afémie Juziñamui táijitagamieza, ñúefue dibénemo o jaináillena canóllena. Mei fiénidifue o finóadi, aféllaimana jacíruiredio, mei afémie duere finótalle ríino táinomona iñegaza. Uafue, afémie Juziñamui táijitagamie nana fieni itino duere finótallena. Nana íaioi fieni finócafue íllaze ñue jaícina íaioina duere finótaite.

5 Ie jira ocuídillaini anamo itábicairediomoí, daa duere omoi fínobiñeillena, mei íadi daje izói

Juzíñamui jóonega omoï comeci úrilla uai jeire omoï óllena.

⁶ Afe bie izói ñue omoï íllena, ocuídillaini lloga gobiérnomo ibárede úcubena ibáfirediomoi. Mei jii, aféllaini Juzíñamui táijitagano. Afe íaioi táijinamo izire járitaioidiaioi.

⁷ Iemona naga cómemo dúide raana, mai jeruíñeno ñue íemo ine. Gobiérnomo cai jaináinamona, íaioi ocuica úcube llínoraima lloga gobiérnomo dúide úcubena mai omoï fecari. Daje izói gobierno caimo jicana oga raa, emódomo raiñócana áfena mai omoï ibari. Naga ocuídillaimamo dúide ñúefuedo jacíruioinafue, áfedo ñue íena omoï jacíruiri. Daje izói naga jamánomoidillaimamo dúide ñúefuena, mai áfena íemo omoï nitari.

⁸ Omoï záitaiñega ibállifueña bumo itáteñeno iri; jáífodo daa ñue ibállifue ite. Afefue jáíimana cai izíruillifue. Afemona daní conímaíaina izíruiredicai. Mei naga conímana izíruitimie, áfedo Juzíñamui ocuica uaina ñue jaícina fuitádeza.

⁹ Jaiai Juzíñamui ocuica lletara uaillai daide: “Jíruífueña finóñeno iri, cómena titáñeno iri, meríriñeno iri, jáímamo táinona lloñeno iri, jáíimie mo ite ráaniairi úradoiñeno iri.” Mei íadi bie ocuica uaillai naa jáíe lletara uáillairi daa bie dáinamo dájena itíaioi: “Dama o abina o izíruilla izói, afe izói o abi cómena izíruiri.”

¹⁰ Izíruitimie ie abi cómemo fiénidifueña finóñede; íemona izíruillafuedo Juzíñamui ocuilla uaillai ñue jaícina jino zuitárede.

¹¹ Nana bífuiaimo jeire omoï ua llezica, birui

cai illáruillaimo ñue mai cai uibíoilli. Ja iere abi cai rairuúlliruimo ja dúcidicai. Afemo ñue omoi comécioiri. Mei Jesucristo caina jíllotajano uire jíáiruido caina uáibiteza. Afe ie cai uáibilliruimo ja áinozide. Fueñe Jesús uaina cai ínua llezica, afe cai ie uáibillirui bai jica ite, mei íadi birui ja aféruimo itícaiza.

¹² Bie énie fiénidifue árera naio izoide. Afe bie árera naio ja monáiacade. Jítinomo finoca fiénidifuiái fínuana ja fáicanocairedicai. Fuiríraima ie abi ríidua llojeco jítaja izói, afe izói íaifue cai fínoñeillena cai comeci rairuúllafuena jeire óredicai. Ie mei ñúefuedo, úzefomo itino izói macáredicai.

¹³ Ua, úzefomo itino izói, mai ñue jaícina cai macalli. Jifáifirenafuemo mai cai íñeilli, naa fiénide aillo güillárenafuiairi. Afe izói nana jiruífuiaimo mai cai íñeilli, naa jíáie comeci meáire óiacanafuiairi. Daje izói dájena comécíñedimaci izói íñeno omoi iri. Iemo jíái fiénide júfidogafuedo mai cai úriñeilli, naa úradoillafuiairi.

¹⁴ Mei jíáifodo Jesucristo ñue illa izói, ie cánuado afe ñue illáfuemo mai omoi iri. Omoi comécimo ite fieni óiacanafuemo, afemo mai omoi comécíñeno iri. Daje izói, afefue omoi finóllemo mamériñeno omoi iri.

14

O ama jánana fñeni úriñeno iri

¹ Juzíñamui uai como fueñe jabo ínnotimiena, ñue jofo omoi cígimo llínori. Afémie ínogafuena féitaiacaniadi íena caimare uáidori. Ua, ie ínoga

onóñega uáillaimo aillo omoi úridoñeno caimare íena omoi uáidori.

² Mei jii, “Naga raana íáiruiñeno güüredicai,” daífiredinona ite. Daje izói dáarie Juzíñamuimo jabo ínotino “Rillena riñeno da ria llizillana güüredicai,” daífirediaioi.

³ Ie jira naga raana güitímie mai afe rillena fímairitímiena jámairuiñeno iri. Afe izói, fímairitímie, mai naga raana güitímie mo comeci fiene facáñeno iri. Mei Juzíñamui afe íaillinoi, íemo ínuamona, ie comínina caimare íaillinoína uáidoteza.

⁴ Afémaci Juzíñamui ocuícamaciza, íaioína fiénidifuedo jicánonidio, mei afémaci óieñedeza. Dani íaioi ocuídímie mo uai orédiaioi. Iaioi illafue riire jicánollena dama íaioi ocuídímie mo dúide. Ocuícámie illafue ñúenia, ie ocuide Juzíñamui uícomo méairuiñeno náidaite. Ie illafue fiénia, ie ocuide Juzíñamui duere íena fínoite. Mei íadi afémie ñúefue dibénemo féitañeno íite, mei cai Ocuíraima Jesucristo ríinoredeza, afémiena ñúefuemo jaícina jaináitallena.

⁵ Daje izói, dáamie nágaruillai baímo daa illirui eneno rairuide, Juzíñamuina caimátaillena aferui judíuai ráfuena jira. Jiáimaci naga mona daje izói ñúeruillai, daídíaioi. Illa dígamie dama ie comeci úrillafuena ñue onótaredeza.

⁶ Daruina eneno ráiruitímie, cai Ocuíraima íóbitallena íeiena íllamona, aféruina eneno rairuide. Daje izói nana raana güitímie cai Ocuíraima íóbitallena íáiruiñeno güífiredie, mei afémie afe güílleri Juzíñamuina “Iere figura” dáideza. Daje izói

cai Ocuíraima ióbitallena fímairitimie fímairillano Juzíñamuina “Iere figura” daide.

⁷ Nana cáimona buna dama ie comeci ióbioillena ínide; daje ízoi buna dama ie comeci ióbillena tíñede.

⁸ Cai caana llezica cai Ocuídimiemo jaináidicai. Daje izói cai tíadi, nai íemo jaináidicai. Iemona cai caana llezica, mei nibai cai tíilla llezica, jaca cai Ocuíraima iédicai.

⁹ Mei jira Cristo tízaibillano, meine abido cáadimiena jaide, cáadino náamata izói, daje izói tíidinona náamatallena.

¹⁰ Mei íadi comínina náamañedio. Iemona ¿nibái mei o ama jánana fieni úrillano íena riire jicánotio? ¿Nibái mei íena izíruiñeno jámairuitio? Mei ji, nana cai Cristo uíécomo ácatallicai. Afénomo afémie caimo itífuenta riire jicánoite.

¹¹ Juzíñamui Cuegáuai llote:

Uáfuenta jaca ninomo cáadimiena cue íllana onódiomoiza; afe izói uáfuenta nana comini cuemo eróicana íaioi cañici ífodo dújuzaibitiaioi.

Daje izói nana comini jino uáfodo ñúfuenta Juzíñamuimo nítaitiaioi, daide.

¹² Iemona jae onódicaiza, cáimona illa dígamie dama ie illáfuenta afe Juzíñamuimo jáanoñeno jino íemo llórede.

O ámana ñúfueмона oni nibéfodo baiítañeno iri

¹³ Ie jira benómona mai conímaiana comécido fieni úriñeno iri. Mei jíáfodo, nágarui omoi finócafuiado conímana fiénidífueмо omoi baiítañeno iri áfemo mai ñue omoi mamériri. Daje

izói omoí illáfuedo afémiena fieni facátañeno iri. Afemona abí omoí rairuiri.

14 Jae onódicueza, nana güille naa rílleniari, dama íainideza. Ua, cai Ocuíraima Jesumo cue ínuamona, ie daina izói, cómena íáiruitaite güille íñédeza, ñue onódicue. Daa “Bíena cue güíadi cuena íáiruitaite” comécido daidímíemo, afe raana afémie güíadi íena íáiruitarede.

15 Mei jíáfodo, o ama comécilla rairuica güille o güíllamona o ama o ríitaiadi, íena ja figo izíruiñedio. Mai daade o güíacaga güíllado, Jesumo o ínote ama íaifuemo féiraitañeno iri; mei afémie jíllloillena Cristo tíizaíbiteza.

16 Omo ite ñue finócafuiado jíáimacina fieni úritañeno iri.

17 Mei jíí, daa cai güiga raado Juzíñamui comínimo jaináiñedicaí; daje izói daa cai jiroca raado afémacimo jaináiñedicaí. Mei jíáfodo Juzíñamui anamo ñue jaícina cai íllamona Juzíñamui comínimo jaináitagacaí. Daje izói Ñuera Joreño caimo comuítaga caimare comeci uái illáfuedo, afe dibénemo jaináitagacaí. Daje izói íeri cai íóbioillafuedo, dájena ie comínimo jaináitagacaí.

18 Cristo lloga iodo jailla llezica, nana bífuiaina jeire otímie Juzíñamuina íóbitade. Afe llezica afe izói finófiredino comini ñue facátagamaci.

19 Iemona, naga come conímána caimare uái itátatifuiaina nágarui mai cai jenófireilli. Daje izói conímána Juzíñamuimo baimo izire jaináitaja raa, mai cai jenófireilli.

20 Daa o óiacaiga güíllado, dani omoí cígiri

Juzíñamui comuítaga caimare dájena omoi jaináinana, mai fia táinomo fáifitañeno iri. Uafue, nana Juzíñamui finoca güille güirede, mei ja ñúeraza. Mei íadi daa o güiga güílledo jiáimana ñuera iómona oni nibéfodo o baiítaiadi, afe fiénide.

²¹ Daje izói rille o ríamona jiáimana fiénidifuomo o baiítaiadi, ríllena o ríñeille, afe baimo ñuera. Afe izói vino o jíruamona íena ie ñnogafue o uáitaiadi, vínona o jiróñena afe baimo ñuera. Daje izói nana o fínuafulaímona jiáima ñnogafue jabo o féitaiadi, afe o finócafue fiénide. Mei íemona afefue o finóñedionia jamánomo ñuera, o ama ñnogafue o féitañeillena.

²² Iemona bie güillafue, nibai güíñenafue dibénedo o ñuera ñnogafue fáicanocaiñeno, Juzíñamui eróicana dama óiena ñue o mameri. O comécido mamérrillamona finóacagafuai dibénedo ñuera o daiíreniadi, áfedo caimare itio.

²³ Mei íadi dámie Juzíñamuimo figo ñnoñenamona ie güille jizíreoicana güíadi, afémie fiénidifuomo báide. Mei Juzíñamuimo ñnuamona cai onoiga íena ióbitallifue cai finoca ñuera, mei íadi nana aféfuiai jinomo cai finócafuai fiénideza.

15

Dama o abina ióbitañeno o ñnote ámana ñue ióbitari

¹ Nane Jesumo ñnotinuaímona dámerie ñue ríinorede. Jiáimaci figo comécina náinidiaíoi. Cai ja comécina ríinoredinodicai, íemona nai comécina ríinidinona canóredicai. Afefue caimo llonódacaigafue. Afedo dani cai abina ióbitanidicai.

² Cáimona illa dígamié ie ínote ámana ióbitarede, afémié ñue íllena. Daje izói íena Juzíñamuimo aillo ínotaredicai.

³ Mei Cristo dama ie abiri ióbillena jenóñede. Mei jíáfodo Juzíñamui Cuegáuai íemo zúilla. Afe uai daide: “Afe báíñoridino Juzíñamui jíáima báíñoia cuemo baite.”

⁴ Nana jaiái uícodo Juzíñamui Cuegáuailai cai llófuellena cueda. Aféuaimo cai comeci fíraja uai baiticai. Afe izói búai cai facáduamona comeci járitañenafue caimo comuide. Iemona Juzíñamuimo íco cai nabáirizailliruimo ocuírídicaí.

⁵ Juzíñamui afe comeci járidoñenafue llotímie. Daje izói afémié, cai comeci fírajano caina náiretade. Iemona omoi ie canóllena afémiemo jícadícue, illa dígamié jíáimaiáiri dájena caimare omoi íllena. Mei Cristo Jesús daí caina dáideza.

⁶ Afe llezica, dájena omoi comécíllena íemo jícadícue, cai Ocuíraíma Jesucristo Moo Juzíñamuina dáuaido omoi caimátaitallena.

Judíoñedíno Juzíñamui ñúefue jae llujáiga

⁷ Mei daí Cristo caimare cai uáidua izói, afe izói conímana caimare omoi uáidori, Juzíñamuimo ebíredí fue nitállena.

⁸ Mei bie cue daína uai: Cristo judíuai ñue fínuaíbite. Nana Cristo táijina fueñe judíuaimo dúide, cai nanóidígimana daína uai ñue fuitállena. Afedo Juzíñamui ie méidoñega llogáuaina caimo jino ácatate; mei Juzíñamui afe ie daína uai jaca jíáfodo méidofinideza.

⁹ Daje izói judíoñedíno Juzíñamuimo ióbillena Cristo ana bíniemo bite. Iemona Juzíñamui íaióimo

dúecaillari ióbidiaioi. Juzíñamui Cuegáuai jaiiai uícodo daí daide:

Ie jira afe izói judíoñede náiraiai cígiri omo caimátaiticue.

Omo ñúefue cue nitalle rua afémaci cígimo róiticue.

¹⁰ Ie mei jiáinomo Cuegáuai daje izói daide:

Judíoñede náiraiai mai omoi cáimacairi, naa Juzíñamui imáciairi.

¹¹ Nane jiáinomo Cuegáuai daje izói daide:

Naga judíoñede náiraiai, cai Ocuíraima ióbiri.

Mei afe Juzíñamui jamánomoidmieza, íemo omoi ióbiri.

¹² Mei daje izói Isaías cuete:

Isaí (illaíma David moo) ie méifomo comuídigimamona jamánomoidillaíma cómuite.

Afémie nana judíoñedino cígiri illáimaite.

Afe comini afémiemo ocuírítiaioi, daide.

¹³ Juzíñamui caina íemo ocuírítaite. Ie jira íemo omoi ínuamona ñue cáimafue jeire omoi óllena, afémiemo jicádícue, daje izói omoi comeci caimare uái illafue jicádícue. Afe llezica Juzíñamuimo omoi nabáirizaillena birui jabo ocuírídíomoi. Afemona Ñuera Joreño rínodo ñue izire omoi ocuírillena Juzíñamuimo jicádícue. Mai mei daí Juzíñamui ómoína ñue ézicíteza.

¹⁴ Cue ámatiai, ñue onódicueza, ñúefuiaína jeire otíomoi naa omoi fibítainafuiaiiri. Daje llezica illa dígamie jiáimacina caimare llófuiana onódiomoi.

¹⁵ Mei íadi bie cue cuegábedo, bíuailai ómoímo iere jino uáfodo cueticue, afe uáillaína omoi féitañeillena. Juzíñamui cuemo dúecaillano cuemo jóonenocaigafue jino llotícue.

16 Bie cue táijinafue: Juzíñamui lloga cai jilloillifue ómoimo cue lluájillena. Afefue ómoimo lloticue, Juzíñamui íena omoi maméillena, mei judío imáciñediomoiza. Ie mei, Juzíñamui ómoína caimare uáidoite, mei omoi ja Ñuera Joreño ñue finócaomoiza.

17 Mei daí dama Jesús cue ínuamona, Juzíñamuimo cue táijinafueri ióbillano caimare iticue.

18 Dama Cristo cuedo finócafuiairi llócaiticue, mei áfedo judíoñedino Juzíñamui uaina jeire otátaticueza. Jiáimie táijinafuena jaca jino llócañeiticue. Afe íaioi Juzíñamui uailai jeire ua, cue daína uáillaído jino ñue ícoimo fuitádicue. Daje izói cue ñue táijnado íaioína ñue jaícina ínotadicue.

19 Afe izói jino cue cíotaga uaido comuítaga cíorainina ráamona íemo jiáie onóillena finócafuiairi, íaioína ñue jaícina ínotadicue. Daje izói Ñuera Joreñomo ite ríinodo íaioína ñue jaícina ínotadicue. Bie izói cue ínuamona Jesucristodo cai jilloillifue lluájillena ja ñue ícoimo fuitádicue. Ua Jerusalémona oni jica nágagobiaído aféfuena llócaidicue. Ua ícoimo Ilírico éniemo zaitajidicue.

20 Afe daí, nai jaca Cristo mámecina cacáñedinuiaimo, afe ñuera cai jillonafue llócaidicue. Daí oni jicado llócaidicue, jiáima jae llógamo dáanomo nane cue llóñeillena.

21 Mei íadi Juzíñamui jaijai Cuegáuai daína izói: Juzíñamui ífuena nai lloñéganuiai afémiena ñue ónoítiaioi.

Daje izói jaca íena cacáñedino nane aféfuena como fídítiaioi, daide.

Pablo Rómamo jáillena comeci facade

²² Diga icaiño omoi uáiduaillena comeci facáfiredicue, íadi jaca jáinidicue. Mei como ómoimo cue lloga oni nágagobiaido cue llócaigafuemo záitaiacadicueza; bínidicue.

²³ Mei ja birui bígobiaido cue táijicana ja fuitádicueza. Jaijai diga fimónaijai omoi diga íacadicue.

²⁴ Ja birui Españamo cue jáizailla llezica ómoína méiñuaíbiacadicue. Omoi cígiri cue illa llezica, iere caimare ííticue. Afe mei Españamo cue jáiacana llezica, omoi cue canóllena jítaiticue.

²⁵ Mei íadi birui fueñe Jerusalemo ite ámatiaí canolle raa úíticue.

²⁶ Macedonia énie imaci, naa Acaya énie comíniri, Jerusalemo ite dúeredino canolle úcube ofítallena maméritiaioi. Afe íaioi ofítaga úcube cuedo Jerusalemo óreitiaioi.

²⁷ Afe bie úcube oréllemo ñue comécidiaioi. Mei jii, afefue ñue jaícina joidé. Uafue benó itímaci afémacimona aillo comeci cáimafuiaí íbáñeno itíaioi. Iemona birui Jerusalemo ite ínotinomo raíre íballe ite. Ua judúuaimo ite Jesumo ínotino, íaioimo ite comeci cáimafuiaí, jae judúuáñedíno dájéze fecádiaioi. Iemona benó Macedóniamo ite ínotino naa Acaya ínotinori, judúuaimo ite ínotinona, afe íbana íaioimo ite úcubedo canócadiaioi.

28 Bie íaioi afémaci cánuu mei, afe izói íaioi jóonega úcube cue izájille mei, Espáñamo jáitícue. Ua omoi uáidocana afénomo jáitícue.

29 Ñue onódicueza, omoi cígiri cue dúcille llezica, nana Cristo uáimona comuide cáimafuiai ómoimo llófuere dice.

30 Amatiai, cai Ocuíraima Jesucristo mámechido izire ómoimo jicá dice. Daje izói Ñuera Joreño caimo comuítaga izíruillafuedo izire ómoimo jicá dice. Mai, cue diga dájena omoi iri, Juzíñamuimo dájena cai úrilla. Juzíñamui cue canólleza, mai izire omoi jicari.

31 Dinó Judea éniemo ite ínoñedino cue íaioi llaitáacanamona cue ie zuitálleza izire Juzíñamuimo jicari. Afe llezica bie cue uiga Jesumo ínotino canolle úcube caimare íaioi llínolleza, daje izói Juzíñamuimo omoi jicari.

32 Bie Juzíñamuimo omoi jicáfireillífuiai ómoimo jónenocaidícue, Juzíñamui comeci jítaina izói omoi illánomo caimare cue dúcillena. Afe mei omoi cígiri nano áinori cue ílledo cue comeci ñue náireite.

33 Mai, comeci caimare uái illáfuena fecade Juzíñamui omoi ñue nábaiteza. Daiítadeza.

16

Pablo ie onóigamací uáidote

1 Birui cai Jesumo ínote miríngo Fébena, ómoína caimare uáidotadícue. Afengo Cencrea jófuemo ite Juzíñamuimo gairídímací canófiredingo.

2 Cai Ocuíraima mámechido aféngona caimare omoi llínori. Mei nana Jesumo ínotino illa

dígamié jiáimana daií caimare llínofiredeza. Daje izói nana afengo jitailla raana aféngomo omoi fecari. Afedo aféngona canórediomoiiza, mei afengo jaiái aillo comínina canófiredeza. Iemo jiái daje izói cuena canódeza.

³ Iemo Aquílamo ie ai Priscila diga, uai orédicue; mei afe íaillinoi Cristo Jesús uaimo cue táijicana llezica cuena nabáidiaillinoi.

⁴ Jácinomona cue íaillinoi jílloado íaillinoi illafue jacire fiébide. Aferi afe íaillinoína “Iere figura” daidicue. Dama cue daií daiíñenaza, nana judíuaiñedinomona gairífirede ámatiai daje izói “Iere figura” daidíaiói.

⁵ Daje izói Aquila Priscila jofomo gairífirede cai ámatiai uáidori. Daje izói cue izíruiga nabai Epeneto uáidori. Afémie fueñe Acaya éniemona Crísto mo ínotimie.

⁶ Afe izói ómoido iere táijífiredingo María omoi uáidori.

⁷ Iemo llavéracomo cue llaveina llezica, cue diga llaveca cue nabai Andrónico, Junias diga, daje izói afe íaillinoi omoi uáidori. Cáizie ímie íaillinoi. Jesús orécamacimona mámecina jica jalleide íaillinoi. Afe íaillinoi nai Crísto mo cue ínoñenia, raire úcodo Crísto mo ínotiaillinoi.

⁸ Afe izói cue izíruiga nabai Amplias uáidori, mei cue izói cai Ocuíraimamo jaináideza.

⁹ Iemo Cristo Jesumo cue táijina llezica, cue nabai Urbano uáidori. Daje izói cue izíruiga Estaquísimo uai orédicue.

¹⁰ Afe izói Apeles uáidori, mei diga ícaiño Crísto mo ie ínogafuena afémie jino comínimo ciótateza. Daje izói nana Aristóbulo comíni uáidori.

11 Cue nairai ímie Herodiómo daje izói uai orédicue, naa cai Ocuíraimamo ínote Narciso comíniri.

12 Daje izói Trifena ie ai Trifosa diga uáidori. Afe íaillinoi cai Ocuíraima táijinamo táijífirediaillinoi. Daje izói cai izíruiga miríngo Pérsida uáidori, mei afengo cai Ocuíraima táijinamo táijífiredeza.

13 Iemo mámecina jica jalleide Ocuíraimamo ínotímie Rufo uáidori, naa ie ei diga. Afengo aillo cuena ie izíruillado cue ei izoide.

14 Daje izói Asíncritomo uai orédicue. Iemo Fle-gonte, íemo Hermas, íemo Patrobas, íemo Hermes, daje izói íaioiri ite ámatiai uáidotícue.

15 Daje izói Filólogo, Julia, Olimpas, Nereo, naa ie miríngooiri uáidori. Iemo nana íaioiri ínote ámatiai uáidori.

16 Mai, illa dígamie Crístomo izíruillamona conímana caimare uáidori. Daje izói benó Juzíñamuimo gairíracuai imaci ómoimo uaillai orédiaioi.

17 Amatiai, bifue jeire omoi óllena izire jicádicue. Conímaiaina éoitadinomona abí omoi rairuiri. Afémaci jíáimana fieni éicitailla izói finódiaioi, omoi ñue ínogafue féitallena. Baimáci jíáimana énenoruitaitaioi. Bie íaioi lloga uai, nauí omoi cue llófuiafuenta uáitaacadeza. Afémacimona oni jicado omoi iri.

18 Afe izóidino cai Ocuíraimo comeci jitaina izói íñédiaioi. Dani íaioi comeci gáinanomo táijídiaioi. Afe llezica íaioimo ite caimare ebírerie urilla uaido, comécina nífuenidínona jífuetiaioi.

19 Nana jíáie comíni Juzíñamui uai jeire omoi

úana fididiaioi. Iemona áferi ióbidiçue. Iemo ñúefue dibénedo iere baitádimacina omoi íllena jitáidicue. Mei jiáifodo fiénidifue fínua dibénedo nífuenide onóñedimacina omoi íllena jitáidicue.

20 Mei onódicaiza, comeci caimare uái illafue llote Juzíñamui Taife uaina anáfenoiteza, omoi ie áifedoñeillena. Mei cai Ocuíraima Jesucristo ómoína ñue ézicíteza.

21 Cue diga táijiacade nabai Timoteo ómoimo uai orede. Daje izói cai nairai ímíiaí Lucio, íemo Jasón, íemo Sosípater diga ómoimo uaillai orédiaioi.

22 Pablo ocuica rabe cúeraimadicue; cue mámeçi Tercio. Daje izói Jesumo cue jaináinamona uai ómoimo orédicue.

23 Benó ite Gayo ómoína uáidote. Birui afémie jofomo iticue. Daje izói nana Juzíñamuimo gairíacadinomo íaioi dúciillena, afécona nano íanori íaioimo fiede. Daje izói cai jófuego ite úcubemo táijidimie Erasto, uai ómoimo orede. Iemo cai ama Cúartona mámeçiredimie uai ómoimo orede.

24 Mei cai Ocuíraima nana ómoína ñue íllena ézicíteza. Daítadeza.

Iraicaiño Juzíñamuimo caimátaillafue Pablo úrite

25 Juzíñamuimo mai cai caimátailli, mei afémie omoi ínogafuena iere izire ínotaredeza. Cue ómoimo jino lloga cai jílluille uai daí dáideza. Daje izói Jesucristodo omoi cue llófuiafue daí dáideza. Juzíñamui jaiiaí ie comécido mamérilla izói, ja birui judíoñedino comécina ñue náiretade. Ua, bínie nai cómuíñenia, bífuena jica ia daí comécido mamede. Ja diga fimona jaide íadi, aféfuena báinino íteza, nai jino comínimo uáfodo llóñega.

²⁶ Mei íadi ja birui Juzíñamui uai llócaidino cáiena fieca Cuegáuaido, afefue jae jino denoca. Bifue ziiño Juzíñamui ocuilla izói caimo íficaide. Bie fueñe báinino Juzíñamui comécido mamérillafue, ja birui nana náiraiaimo jino cíotaga, aféfuena íaiói onóillena. Daje izói afefue jae jino íaióimo cíotaga, comécido ínota afe uaimo ñue jeire íaiói óllena.

²⁷ ¡Daade jamánomo baitade Juzíñamuimo ebírede ñúefuiai nítaiticaiza! ¡Daií afémiemo Jesucristodo ziiñona jaca ninomo llóiticaiza! Mei daiítadeza; jae ñie.

Juziñamui Ñuera Uai
New Testament in Huitoto, Minica

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Minica

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
740f11a2-2e26-57f5-a3a7-5deb2d20bd24